

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

षष्ठकाण्डे प्रथमः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Contents

**6 कृष्ण यजुर्वेदीय तैत्तिरीय संहितायां पद पाठे षष्ठं
काण्डं 3**

6.1 षष्ठकाण्डे प्रथमः प्रश्नः – सोममन्त्रब्राह्मणनिरूपणं 3

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

6 कृष्ण यजुर्वेदीय तैत्तिरीय संहितायां पद पाठे षष्ठं काण्डं

6.1 षष्ठकाण्डे प्रथमः प्रश्नः – सोममन्त्रब्राह्मणनिरूपणं

TS 6.1.1.1

प्राचीनव॑ञ्शं करोति देवमनु॑ष्या दि॒शो व्य॑भजन्त प्राचीं॑ दे॒वा
दक्षि॑णा पि॒तरः प्र॒तीचीं॑ मनु॑ष्या उदी॑चीञ् रु॒द्रा यत् प्राचीनव॑ञ्शं
करोति॑ दे॒वलोक॑मे॒व तद्-यज॑मान उपा॑वर्तते परि॑ श्रयत्यन्त॑र्हि॒तो
हि दे॒वलोक॑ो मनु॑ष्यलो॒का-न्नास्मा॑ल्लो॒कात् स्वे॑तव्यमि॒वेत्याहुः॑ को
हि तद्-वे॒द यद्-यमु॑ष्मिँल्लो॒केऽस्ति॑ वा न वेति॑ दि॒क्ष्वती
का॒शान् करो॑ – [] 1

TS 6.1.1.1 - Padam

प्राचीनव॑श्मिति॑ प्राचीन॑ – व॑श्म॒ । करोति॑ । दे॒वमनु॑ष्या इति॑
दे॒व – मनु॑ष्याः । दि॒शः । वी॒ति । अ॒भज॑न्त । प्राची॑म् । दे॒वाः ।
दक्षि॑णा । पि॒तरः । प्र॒तीची॑म् । मनु॑ष्याः । उदी॑चीम् । रु॒द्राः । यत् ।
प्राचीनव॑श्मिति॑ प्राचीन॑ – व॑श्म॒ । करोति॑ । दे॒वलोक॑मिति॑
दे॒व-लो॒कम् । ए॒व । तत् । यज॑मानः । उ॒पाव॑र्तत इत्यु॒प – आ॒व॑र्तते ।
परी॑ति । श्रय॑ति । अ॒न्तर्हि॑त इत्यन्तः – हि॒तः । हि॒ । दे॒वलोक॑ इति॑
दे॒व – लो॒कः । मनु॑ष्यलो॒कादि॑ति मनु॑ष्य – लो॒कात् । न । अ॒स्मात् ।
लो॒कात् । स्वे॑तव्यमिति॑ सु – ए॒तव्य॑म् । इ॒व । इति॑ । आ॒हुः । कः ।
हि॒ । तत् । वे॒द । यदि॑ । अ॒मुष्मि॑न् । लो॒के । अ॒स्ति । वा॒ । न । वा॒ ।
इति॑ । दि॒क्षु । अ॒तीका॑शान् । करोति॑ । 1 (50)

TS 6.1.1.2

-त्यु॒भयो॑र्लो॒कयो॑-र॒भिजि॑त्यै के॒शश्म॑श्रु व॒पते॑ न॒खानि॑ नि कृ॑न्तते
मृ॒ता वा ए॒षा त्वग॑मे॒द्ध्या यत् के॑शश्म॑श्रु मृ॒तामे॒व त्वच॑म-
मे॒द्ध्याम॑प॒हत्य॑ य॒ज्ञियो॑ भू॒त्वा मे॒धमु॑पैत्यङ्गि॑रसः सु॒वर्गं॑ लो॒कं

य॑न्तोऽप्सु॑ दी॒क्षा॒त॒प॒सी॑ प्रा॒वे॒श॒य॒न्नाप्सु॑ स्ना॒ति सा॒क्षा॒दे॒व दी॒क्षा॒त॒प॒सी॑
अ॒व रु॒न्धे ती॒र्थे स्ना॒ति ती॒र्थे हि ते तां प्रा॒वे॒श॒य॒न् ती॒र्थे
स्ना॒ति – [] 2

TS 6.1.1.2 - Padam

उ॒भ॒योः । लो॒क॒योः । अ॒भि॒जि॒त्या इत्य॑भि – जि॒त्यै । के॒श॒श्म॒श्र्वि॒ति
के॒श॒श्म॒श्रु । व॒प॒ते । न॒खानि॑ । नी॒ति । कृ॒न्त॒ते । मृ॒ता । वै । ए॒षा ।
त्वक् । अ॒मे॒द्ध्य॑ा । यत् । के॒श॒श्म॒श्र्वि॒ति के॒श – श्म॒श्रु । मृ॒ताम् ।
ए॒व । त्व॒च॒म् । अ॒मे॒द्ध्य॑ाम् । अ॒प॒ह॒त्ये॒त्य॒प॒ह॒त्य॑ । य॒ज्ञि॒यः । भू॒त्वा ।
मे॒ध॒म् । उ॒पे॒ति । ए॒ति । अ॒ङ्गि॒र॒सः । सु॒व॒र्ग॒मि॒ति सु॒वः – ग॒म् ।
लो॒क॒म् । य॒न्तः । अ॒प्सि॒स्व॒त्य॒प्-सु॑ । दी॒क्षा॒त॒प॒सी इति॑ दी॒क्षा-त॒प॒सी॑ ।
प्रे॒ति । अ॒वे॒श॒य॒न् । अ॒प्सि॒स्व॒त्य॒प्- सु॑ । स्ना॒ति । सा॒क्षा॒दि॒ति
स – अ॒क्षा॒त् । ए॒व । दी॒क्षा॒त॒प॒सी इति॑ दी॒क्षा – त॒प॒सी॑ । अ॒वे॒ति ।
रु॒न्धे । ती॒र्थे । स्ना॒ति । ती॒र्थे । हि । ते । ताम् । प्रे॒ति । अ॒वे॒श॒य॒न् ।
ती॒र्थे । स्ना॒ति । 2 (50)

TS 6.1.1.3

ती॒र्थमे॒व॑ स॒मा॒ना॒नां॑ भव॒त्यपो॑ऽऽ॒नात्यन्त॑रत ए॒व मे॒द्ध्यो॑ भव॒ति वा॒स॒सा
दी॒क्षय॑ति सौ॒म्यं वै॑ क्षौ॒मं दे॒वत॑या सोम॒मेष॑ दे॒वता॑मु॒पैति॑ यो दी॒क्षते॑
सोम॑स्य त॒नूर॑सि त॒नुवं॑ मे पा॒हीत्या॑ह स्वा॒मेव॑ दे॒वता॑मु॒पैत्यथो॑
आ॒शिष॑मे॒वैता॑मा शा॒स्ते ऽग्ने॑स्तूषा॒धानं॑ वा॒योर्वा॑त॒पानं॑ पि॒तृणां॑
नी॒विरोष॑धी॒नां प्र॒घात॑ – [] 3

TS 6.1.1.3 - Padam

ती॒र्थम् । ए॒व । स॒मा॒ना॒नाम् । भव॒ति । अ॒पः । अ॒श्ना॒ति । अ॒न्त॒रतः॑ ।
ए॒व । मे॒द्ध्यः॑ । भव॒ति । वा॒स॒सा । दी॒क्षय॑ति । सौ॒म्यम् । वै ।
क्षौ॒मम् । दे॒वत॑या । सोम॒म् । ए॒षः । दे॒वता॑म् । उ॒पेति॑ । ए॒ति । यः ।
दी॒क्षते॑ । सोम॑स्य । त॒नूः । अ॒सि । त॒नुव॑म् । मे । पा॒हि । इति॑ ।
आ॒ह । स्वा॒म् । ए॒व । दे॒वता॑म् । उ॒पेति॑ । ए॒ति । अथो॑ इति॑ ।
आ॒शिष॑मि॒त्या – शिष॑म् । ए॒व । ए॒ताम् । ए॒ति । शा॒स्ते । अ॒ग्नेः ।
तूषा॑धा॒नमि॑ति तूष – आ॒धा॒नम् । वा॒योः । वा॒त॒पा॒नमि॑ति वा॒त-पा॒नम् ।
पि॒तृणा॑म् । नी॒विः । ओष॑धी॒नाम् । प्र॒घात॑ इति॑ प्र – घा॒तः । 3 (50)

TS 6.1.1.4

आ॒दि॒त्यानां॑ प्रा॒चीन॑तानो विश्वे॑षां दे॒वाना॑मोतु नक्ष॑त्राणा-
मती॑काशास्तद्वा ए॒तत् सर्व॑ दे॒वत्यं॑ यद्-वासो॑ यद्-वास॑सा दी॒क्षय॑ति
सर्वा॑भिरेवैनं दे॒वता॑भि-दी॒क्षय॑ति ब॒हिःप्रा॑णो वै म॒नुष्य॑स्त-स्या॒शनं॑
प्रा॒णो-ऽश्ना॑ति स॒प्राण॑ ए॒व दी॑क्षत आ॒शितो॑ भव॑ति या॒वाने॑वास्य
प्रा॒णस्तेन॑ सह मे॒धमु॑पैति घृ॒तं दे॒वानां॑ मस्तु॑ पि॒तॄणां॑ नि॒ष्पक्वं॑
म॒नुष्या॑णां तद्वा - [] 4

TS 6.1.1.4 - Padam

आ॒दि॒त्याना॑म् । प्रा॒चीन॑तान इति प्रा॒चीन॑ - तानः॑ । विश्वे॑षाम् ।
दे॒वाना॑म् । ओतुः॑ । नक्ष॑त्राणाम् । अती॑काशाः । तत् । वै । ए॒तत् ।
सर्व॑दे॒वत्य॑मिति सर्व॑ - दे॒वत्य॑म् । यत् । वासः॑ । यत् । वास॑सा ।
दी॒क्षय॑ति । सर्वा॑भिः । ए॒व । ए॒नम् । दे॒वता॑भिः । दी॒क्षय॑ति ।
ब॒हिःप्रा॑ण इति ब॒हिः - प्रा॒णः । वै । म॒नुष्यः॑ । तस्य॑ । अ॒शनम्॑ ।
प्रा॒ण इति॑ प्र - अ॒नः । अ॒श्ना॑ति । स॒प्राण॑ इति स - प्रा॒णः । ए॒व ।
दी॒क्षते॑ । आ॒शितः॑ । भव॑ति । या॒वान् । ए॒व । अ॒स्य॑ ।

प्रा॒ण इति॑ प्र – अनः॑ । तेन॑ । सह॑ । मे॒धम्॑ । उपेति॑ । ए॒ति । घृ॒तम् ।
दे॒वाना॑म् । मस्तु॑ । पि॒तृणा॑म् । नि॒ष्प॒क्वमि॒ति निः॑ – प॒क्वम् ।
मनु॑ष्याणाम् । तत् । वै । 4 (50)

TS 6.1.1.5

ए॒तत् स॒र्वदे॒वत्यं॑ यन्न॑वनीतं॒ यन्न॑वनीतेनाभ्यङ्के॒ सर्वा॑ ए॒व दे॒वताः॑
प्री॒णाति॑ प्र॒च्युतो॑ वा ए॒षोऽस्मा॑ल्लो॒काद॑गतो दे॒वलोकं॑ यो दी॒क्षितो॑
ऽन्त॑रेव न॒वनीतं॑ तस्मा॑-न्न॒वनीते॑नाभ्यङ्के॒ ऽनु॒लोमं॑ यजु॑षा व्यावृ॒त्या
इन्द्रो॑ वृ॒त्रम॑हन् तस्य॑ क॒नी॒निका॑ परा॑ऽप॒तत् तदा॑ज्जनम-भव॒द्यदा॑ङ्के
चक्षु॑रेव भ्रातृ॒व्यस्य॑ वृङ्के॒ दक्षि॑णं पू॒र्वमा॑ङ्के – [] 5

TS 6.1.1.5 - Padam

ए॒तत् । स॒र्वदे॒वत्यमि॑ति॒ सर्व॑ – दे॒वत्यम्॑ । यत् । न॒वनी॑तमि॒ति
न॒व – नी॒तम् । यत् । न॒वनी॑तेनेति॒ न॒व – नी॒तेन॑ । अ॒भ्यङ्क
इत्य॑भि – अ॒ङ्के । सर्वाः॑ । ए॒व । दे॒वताः॑ । प्री॒णाति॑ । प्र॒च्युत॑ इति॒
प्र – च्यु॑तः । वै । ए॒षः । अ॒स्मात् । लो॒कात् । अ॒गतः॑ ।
दे॒वलो॒कमि॑ति॒ दे॒व – लो॒कम् । यः । दी॒क्षितः॑ । अ॒न्तरा॑ । इ॒व ।

न॒वनी॑तमि॒ति न॒व – नी॒तम् । तस्मा॑त् । न॒वनी॑तेनेति न॒व – नी॒तेन॑ ।
 अ॒भीति॑ । अ॒ङ्के । अ॒नुलो॒ममि॒त्यनु॑ – लो॒मम् । यजु॑षा । व्यावृ॑त्या
 इति॑ वि – आवृ॑त्त्यै । इन्द्रः॑ । वृ॒त्रम् । अ॒हन् । तस्य॑ । क॒नीनि॑का ।
 परेति॑ । अ॒पत॑त् । तत् । आ॒ञ्जन॑मि॒त्या-अ॒ञ्जन॑म् । अ॒भव॑त् । यत् ।
 आ॒ङ्क इ॒त्या – अ॒ङ्के । चक्षुः॑ । ए॒व । भ्रातृ॑व्यस्य । वृ॒ङ्के । दक्षि॑णम् ।
 पूर्॒वम् । एति॑ । अ॒ङ्के । 5 (50)

TS 6.1.1.6

स॒व्यꣳ हि॑ पूर्॒वं म॒नुष्या॑ आ॒ञ्जते॑ न नि॒ धाव॑ते नी॒व हि॑ म॒नुष्या॑
 धाव॑न्ते पञ्च॑ कृ॒त्व आ॒ङ्के पञ्चा॑क्षरा पङ्क्तिः॑ पाङ्क्तो॑ य॒ज्ञो य॒ज्ञमे॒वाव॑
 रुन्धे॑ परि॒मित॒माङ्के॑ ऽपरि॒मितꣳ हि॑ म॒नुष्या॑ आ॒ञ्जते॑ स॒तूल॒याऽङ्के-
 ऽप॒तूल॒या हि॑ म॒नुष्या॑ आ॒ञ्जते॑ व्यावृ॑त्त्यै यद॒प॒तूल॒याञ्जी॒त वज्र॑ इ॒व
 स्या॒थ् स॒तूल॒याऽङ्के॑ मि॒त्रत्वा॒ये – [] 6

TS 6.1.1.6 - Padam

स॒व्यम् । हि॑ । पूर्॒वम् । म॒नुष्याः॑ । आ॒ञ्जत॑ इ॒त्या – अ॒ञ्जते॑ । न ।
 नी॒ति । धाव॑ते । नी॒ति । इ॒व । हि॑ । म॒नुष्याः॑ । धाव॑न्ते । पञ्च॑ ।

कृ॒त्वः । ए॒ति । अ॒ङ्के । पञ्चा॑क्ष॒रेति॑ पञ्च॑-अ॒क्षरा॑ । प॒ङ्क्तिः । पा॒ङ्क्तः ।
य॒ज्ञः । य॒ज्ञम् । ए॒व । अ॒वेति॑ । रु॒न्धे । परि॑मित॒मिति॑ परि॑ - मि॒तम् ।
ए॒ति । अ॒ङ्के । अ॒परि॑मित॒मित्य॑परि॑ - मि॒तम् । हि । म॒नुष्याः॑ ।
आञ्ज॑त इ॒त्या - अञ्ज॑ते । स॒तूल॑येति॒ स-तूल॑या । ए॒ति । अ॒ङ्के ।
अ॒प॒तूल॑येत्य॒प-तूल॑या । हि । म॒नुष्याः॑ । आञ्ज॑त इ॒त्या - अञ्ज॑ते ।
व्यावृ॑त्या इति॒ वि - आ॒वृ॒त्यै । यत् । अ॒प॒तूल॑येत्य॒प - तूल॑या ।
आञ्जी॑तेत्या - अञ्जी॑त । व॒ज्रः । इ॒व । स्या॒त् । स॒तूल॑येति॒
स - तूल॑या । ए॒ति । अ॒ङ्के । मि॒त्र॒त्वायेति॑ मि॒त्र - त्वा॒य । 6 (50)

TS 6.1.1.7

-न्द्रो॑ वृ॒त्रम॒हन्त्सो॑ऽ(१)पो॑ऽ(१)भ्य॑म्रिय॒त ता॒सां य॑न्मे॒द्ध्यं य॑ज्ञि॒यꣳ
स॒दे॒वमा॑सीत् तद॒पोद॑क्राम॒त् ते द॒र्भा अ॑भवन्. यद्द॒र्भपु॑ञ्जी॒लैः प॑वयति
या ए॒व मे॒द्ध्या य॑ज्ञि॒याः स॒दे॒वा आ॒प॒स्ताभि॑रे॒वैनं॑ पवयति॒ द्वाभ्यां॑
प॑वयत्य-हो॒रात्रा॑भ्यामे॒वैनं॑ पवयति॒ त्रि॒भिः प॑वयति॒ त्रय॑ इ॒मे लो॒का
ए॒भिरे॒वैनं॑ लो॒कैः प॑वयति॒ पञ्च॑भिः - [] 7

TS 6.1.1.7 - Padam

इन्द्रः । वृ॒त्रम् । अ॒ह॒न् । सः । अ॒पः । अ॒भी॒ति॑ । अ॒म्रि॒य॒त॑ । ता॒साम् ।
यत् । मे॒द्ध्यम् । य॒ज्ञि॒यम् । स॒दे॒व॒मि॒ति॒ स – दे॒वम् । आ॒सीत् । तत् ।
अ॒प॑ । उ॒दि॒ति॑ । अ॒क्रा॒म॒त् । ते । द॒र्भाः । अ॒भ॒व॒न् । यत् ।
द॒र्भ॒पु॒ञ्जी॒लै॒रि॒ति॑ द॒र्भ – पु॒ञ्जी॒लैः । प॒व॒य॒ति॑ । याः । ए॒व । मे॒द्ध्यः॑ ।
य॒ज्ञि॒याः । स॒दे॒वा इ॒ति॒ स – दे॒वाः । आ॒पः । ता॒भिः । ए॒व । ए॒नम् ।
प॒व॒य॒ति॑ । द्वा॒भ्याम् । प॒व॒य॒ति॑ । अ॒हो॒रा॒त्रा॒भ्या॒मि॒त्य॒हः – रा॒त्रा॒भ्याम् । ए॒व ।
ए॒नम् । प॒व॒य॒ति॑ । त्रि॒भि॒रि॒ति॑ त्रि – भिः । प॒व॒य॒ति॑ । त्र॒यः । इ॒मे ।
लो॒काः । ए॒भिः । ए॒व । ए॒नम् । लो॒कैः । प॒व॒य॒ति॑ ।
प॒ञ्च॒भि॒रि॒ति॑ प॒ञ्च – भिः । 7 (50)

TS 6.1.1.8

प॒व॒य॒ति॑ प॒ञ्चा॒क्ष॒रा प॒ङ्क्तिः॑ पा॒ङ्क्तो॑ य॒ज्ञो य॒ज्ञायै॑वैनं प॒व॒य॒ति॑ ष॒ड्भिः॑
प॒व॒य॒ति॑ ष॒ड्वा ऋ॒त॒व ऋ॒तु॒भि॒रे॒वैनं॑ प॒व॒य॒ति॑ स॒प्त॒भिः॑ प॒व॒य॒ति॑ स॒प्त
छ॒न्दा॒सि॑ छ॒न्दो॒भि॒रे॒वैनं॑ प॒व॒य॒ति॑ न॒व॒भिः॑ प॒व॒य॒ति॑ न॒व॒ वै पु॒रु॒षे प्रा॒णाः॑

स॒प्रा॒णमे॒वैनं॑ प॒वय॑त्ये॒कवि॑ंश॒त्या प॒वय॑ति द॒श ह॒स्त्या अ॒ङ्गुल॑यो
द॒श प॒द्या आ॒त्मैक॑वि॒ंशो या॒वाने॑व पु॒रुष॑स्त॒मपरि॑वर्गं – [] 8

TS 6.1.1.8 - Padam

प॒वय॑ति । पञ्चा॑क्ष॒रेति॑ पञ्च – अ॒क्षरा॑ । प॒ङ्क्तिः॑ । पा॒ङ्क्तः॑ । य॒ज्ञः ।
य॒ज्ञाय॑ । ए॒व । ए॒नम् । प॒वय॑ति । ष॒ड्भिरि॑ति षट् – भिः । प॒वय॑ति ।
षट् । वै । ऋ॒तवः॑ । ऋ॒तुभि॑रि॒त्यृतु॑ – भिः । ए॒व । ए॒नम् । प॒वय॑ति ।
स॒प्तभि॑रि॒ति स॒प्त – भिः॑ । प॒वय॑ति । स॒प्त । छ॒न्दाँ॒सि ।
छ॒न्दोभि॑रि॒ति छ॒न्दः – भिः॑ । ए॒व । ए॒नम् । प॒वय॑ति । न॒वभि॑रि॒ति
न॒व – भिः॑ । प॒वय॑ति । न॒व । वै । पु॒रुषे॑ । प्रा॒णा इति॑ प्र – अ॒नाः ।
स॒प्रा॒णमि॑ति स-प्रा॒णम् । ए॒व । ए॒नम् । प॒वय॑ति ।
ए॒कवि॑ंश॒त्येत्ये॒क-वि॑ंश॒त्या । प॒वय॑ति । द॒श । ह॒स्त्याः॑ ।
अ॒ङ्गुल॑यः । द॒श । प॒द्याः॑ । आ॒त्मा । ए॒कवि॑ंश इत्ये॒क – वि॑ंशः ।
या॒वान् । ए॒व । पु॒रुषः॑ । तम् । अ॒परि॑वर्ग॒मित्य॑परि – वर्ग॒म् । 8 (50)

TS 6.1.1.9

प॒वय॑ति चि॒त्पति॑स्त्वा पु॒नात्वि॑त्याह॒ मनो॑ वै चि॒त्पति॑र्म॒नसै॒वैनं॑
प॒वय॑ति वा॒क्पति॑स्त्वा पु॒नात्वि॑त्याह॒ वाचै॒वैनं॑ प॒वय॑ति दे॒वस्त्वा स॒विता॑

पु॒ना॒त्वि॒त्याह॑ स॒वि॒तृ॒प्र॒सू॒त ए॒वैनं॑ प॒व॒य॒ति त॒स्य॑ ते प॒वि॒त्र॒प॒ते प॒वि॒त्रे॒ण
य॒स्मै कं पु॒ने तच्छ॑के॒य॒मि॒त्या-हाऽऽ*शि॒ष॒मे॒वैता॒मा शा॑स्ते ॥ 9

TS 6.1.1.9 - Padam

प॒व॒य॒ति । चि॒त्प॒ति॒रि॒ति चि॒त् - प॒तिः । त्वा । पु॒ना॒तु । इति॑ । आ॒ह ।
म॒नः । वै । चि॒त्प॒ति॒रि॒ति चि॒त् - प॒तिः । म॒न॒सा । ए॒व । ए॒न॒म् ।
प॒व॒य॒ति । वा॒क्प॒ति॒रि॒ति वाक् - प॒तिः । त्वा । पु॒ना॒तु । इति॑ । आ॒ह ।
वा॒चा । ए॒व । ए॒न॒म् । प॒व॒य॒ति । दे॒वः । त्वा । स॒वि॒ता । पु॒ना॒तु ।
इति॑ । आ॒ह । स॒वि॒तृ॒प्र॒सू॒त इति॑ स॒वि॒तृ - प्र॒सू॒तः । ए॒व । ए॒न॒म् ।
प॒व॒य॒ति । त॒स्य॑ । ते । प॒वि॒त्र॒प॒त इति॑ प॒वि॒त्र - प॒ते । प॒वि॒त्रे॒ण ।
य॒स्मै ॥ क॒म् । पु॒ने । तत् । श॒के॒य॒म् । इति॑ । आ॒ह ।

आ॒शि॒ष॒मि॒त्या ॥ - शि॒ष॒म् । ए॒व । ए॒ता॒म् । ए॒ति । शा॑स्ते ॥ 9 (48)

(अ॒ती॒का॒शान् क॑रोत्य - वे॒श॒यन् ति॒र्थ स्ना॑ति - प्र॒घा॒तो -
म॒नु॒ष्या॒णां तद्वा॑ - आऽङ्गे॑ - मि॒त्र॒त्वाय॑ - प॒ञ्च॒भि - रप॑रि॒वर्ग -
म॒ष्टाच॑त्वारि॒ंशच्च॑) (A1)

TS 6.1.2.1

याव॑न्तो॒ वै दे॒वा य॒ज्ञाया॑पुन॒त त ए॒वाभ॑वन्। य ए॒वं वि॒द्वान् य॒ज्ञाय॑
पुनी॑ते भव॒त्येव॑ ब॒हिः प॒वयि॑त्वाऽन्तः प्र पा॒दय॑ति म॒नुष्य॑लो॒क
ए॒वैनं॑ प॒वयि॑त्वा पू॒तं दे॒वल॑ोकं प्र ण॒यत्य॑दी॒क्षित॑ ए॒कया॑ऽहु॒त्येत्या॑हुः
स्रु॒वेण॑ च॒तस्रो॑ जुहोति दी॒क्षित॑त्वाय॒ स्रु॒चा पञ्च॑मीं पञ्चाक्ष॑रा प॒ङ्क्तिः
पाङ्क्तो॑ य॒ज्ञो य॒ज्ञमे॒वाव॑ रुन्ध॒ आकू॑त्यै प्र॒युजे॑ऽग्नये – [] 10

TS 6.1.2.1 - Padam

याव॑न्तः । वै । दे॒वाः । य॒ज्ञाय॑ । अ॒पुन॒त । ते । ए॒व । अ॒भ॒वन् । यः ।
ए॒वम् । वि॒द्वान् । य॒ज्ञाय॑ । पुनी॑ते । भ॒वति॑ । ए॒व । ब॒हिः । प॒वयि॑त्वा ।
अ॒न्तः । प्रेति॑ । पा॒दय॑ति । म॒नुष्य॑लो॒क इति॑ म॒नुष्य॑ – लो॒के । ए॒व ।
ए॒नम् । प॒वयि॑त्वा । पू॒तम् । दे॒वल॑ोकमि॒ति दे॒व – लो॒कम् । प्रेति॑ ।
न॒यति॑ । अ॒दी॒क्षितः॑ । ए॒कया॑ । आहु॒त्येत्या॑ – हु॒त्या । इति॑ । आहुः॑ ।
स्रु॒वेण॑ । च॒तस्रः॑ । जुहोति॑ । दी॒क्षित॑त्वायेति॑ दी॒क्षित॑-त्वाय॑ । स्रु॒चा ।
पञ्च॑मीम् । पञ्चाक्ष॑रेति॑ पञ्च॑ – अ॒क्षरा॑ । प॒ङ्क्तिः॑ । पाङ्क्तः॑ । य॒ज्ञः ।

य॒ज्ञम् । ए॒व । अ॒वेति॑ । रु॒न्धे । आ॒कू॒त्या इ॒त्या – कू॒त्यै ।

प्र॒युज॑ इति॑ प्र – यु॒जे । अ॒ग्नये॑ । 10 (50)

TS 6.1.2.2

स्वा॒हेत्या॒हाऽऽ*कू॒त्या हि॑ पु॒रुषो॑ य॒ज्ञम॒भि प्र॒युङ्क्ते॑ य॒जेयेति॑ मे॒धायै॑
म॒नसे॑ऽग्नये॒ स्वा॒हेत्या॒ह मे॒धया॑ हि॒ मन॒सा पु॒रुषो॑ य॒ज्ञम॒भिगच्छ॑ति
स॒रस्व॑त्यै पू॒ष्णेऽग्नये॒ स्वा॒हेत्या॒ह वा॒ग्वै स॒रस्व॑ती पृ॒थि॒वी पू॒षा वा॒चैव
पृ॒थि॒व्या य॒ज्ञं प्र॒युङ्क्ते॑ आ॒पो दे॒वी-र्बृ॒हती-र्वि॒श्वशं॑भुव॒ इत्या॒ह या॒ वै

व॒र्ष्यास्ता – [] 11

TS 6.1.2.2 - Padam

स्वा॒हा । इति॑ । आ॒ह । आ॒कू॒त्येत्या – कू॒त्या । हि॑ । पु॒रुषः॑ । य॒ज्ञम् ।
अ॒भीति॑ । प्र॒युङ्क्त॑ इति॑ प्र-यु॒ङ्क्ते । य॒जेय॑ । इति॑ । मे॒धायै॑ । म॒नसे॑ ।
अ॒ग्नये॑ । स्वा॒हा । इति॑ । आ॒ह । मे॒धया॑ । हि॑ । म॒नसा॑ । पु॒रुषः॑ ।
य॒ज्ञम् । अ॒भिगच्छ॑तीत्य॒भि – गच्छ॑ति । स॒रस्व॑त्यै । पू॒ष्णे । अ॒ग्नये॑ ।
स्वा॒हा । इति॑ । आ॒ह । वाक् । वै । स॒रस्व॑ती । पृ॒थि॒वी । पू॒षा ।
वा॒चा । ए॒व । पृ॒थि॒व्या । य॒ज्ञम् । प्रेति॑ । यु॒ङ्क्ते । आ॒पः । दे॒वीः ।

बृ॒ह॒तीः । वि॒श्व॒शं॒भुव॒ इति॑ वि॒श्व-शं॒भुवः॑ । इति॑ । आ॒ह । याः । वै ।
व॒र्ष्याः॑ । ताः । 11 (50)

TS 6.1.2.3

आपो॑ दे॒वी-बृ॒ह॒ती-वि॒श्व॒शं॒भुवो॑ यदे॒तद्-य॒जुर्न॑ ब्रू॒याद्-दि॒व्या
आपोऽ॒शान्ता॑ इ॒मं लो॒कमा॑ गच्छे॒युरापो॑ दे॒वी-बृ॒ह॒ती-वि॒श्व॒शं॒भुव
इत्या॑हा॒स्मा ए॒वैना॑ लो॒काय॑ शमयति॒ तस्मा॑च्छान्ता॒ इमं॑ लो॒कमा
गच्छ॑न्ति द्यावा॒पृथि॒वी इत्या॑ह द्यावा॒पृथि॒व्योर्हि॒ यज्ञ॑ उ॒र्वन्त॑रि॒क्ष-
मित्या॑हान्तरि॒क्षे हि॒ यज्ञो॑ बृ॒हस्प॑तिर्नो॒ हविषा॑ वृ॒धा॒त्वि - [] 12

TS 6.1.2.3 - Padam

आपः॑ । दे॒वीः । बृ॒ह॒तीः । वि॒श्व॒शं॒भुव॒ इति॑ वि॒श्व - शं॒भुवः॑ । यत् ।
एतत् । य॒जुः । न । ब्रू॒यात् । दि॒व्याः । आपः॑ । अ॒शान्ताः॑ । इ॒मम् ।
लो॒कम् । एति॑ । गच्छे॒युः । आपः॑ । दे॒वीः । बृ॒ह॒तीः । वि॒श्व॒शं॒भुव
इति॑ वि॒श्व-शं॒भुवः॑ । इति॑ । आ॒ह । अ॒स्मै । ए॒व । ए॒नाः । लो॒काय॑ ।
शम॑यति । तस्मात् । शान्ताः॑ । इ॒मम् । लो॒कम् । एति॑ । गच्छ॑न्ति ।
द्यावा॒पृथि॒वी इति॑ द्यावा॒ -पृथि॒वी । इति॑ । आ॒ह ।

द्या॒वापृ॑थि॒व्योरि॒ति द्या॒वा-पृ॑थि॒व्योः । हि । य॒ज्ञः । उ॒रु । अ॒न्तरि॑क्षम् ।
इति॑ । आ॒ह । अ॒न्तरि॑क्षे । हि । य॒ज्ञः । बृ॒हस्प॑तिः । नः । ह॒विषा॑ ।

वृ॒धातु॑ । 12 (50)

TS 6.1.2.4

-त्या॒ह ब्र॒ह्म वै दे॒वानां॑ बृ॒हस्प॑ति-ब्र॒ह्मणै॑वा॒स्मै य॒ज्ञम॑व रु॒न्धे यद्-
ब्रू॒याद्-वि॒धेरि॑ति य॒ज्ञस्था॑णुमृ॒च्छेद्-वृ॒धात्वित्या॑ह य॒ज्ञस्था॑णुमे॒व
परि॑ वृ॒णक्ति॑ प्र॒जाप॑ति-र्य॒ज्ञम॑सृ॒जत॑ सोऽस्मा॑त् सृ॒ष्टः परा॑डै॒थ् स
प्र य॒जुर॒ल्लीना॑त् प्र साम॒ तमृ॑गुदयच्छद्-यदृ॑गुदयच्छत्
तदौ॑द्-ग्र॒हण॑स्यौ॑द्-ग्र॒हण॑त्व मृ॒चा - [] 13

TS 6.1.2.4 - Padam

इति॑ । आ॒ह । ब्र॒ह्म । वै । दे॒वाना॑म् । बृ॒हस्प॑तिः । ब्र॒ह्मणा॑ । ए॒व ।
अ॒स्मै । य॒ज्ञम् । अ॒वेति॑ । रु॒न्धे । यत् । ब्रू॒यात् । वि॒धेः । इति॑ ।
य॒ज्ञस्था॑णुमि॒ति य॒ज्ञ - स्था॑णुम् । ऋ॒च्छेत् । वृ॒धातु॑ । इति॑ । आ॒ह ।
य॒ज्ञस्था॑णुमि॒ति य॒ज्ञ - स्था॑णुम् । ए॒व । परी॑ति । वृ॒णक्ति॑ ।
प्र॒जाप॑तिरि॒ति प्र॒जा - प॑तिः । य॒ज्ञम् । अ॒सृ॒जत॑ । सः । अ॒स्मात् ।

सृष्टः । पराङ् । ऐत् । सः । प्रेति । यजुः । अल्लीनात् । प्रेति ।
 साम । तम् । ऋक् । उदिति । अयच्छत् । यत् । ऋक् ।
 उदयच्छदित्युत् – अयच्छत् । तत् । औद्ग्रहणस्येत्यौत् – ग्रहणस्य ।
 औद्ग्रहणत्वमित्यौद्ग्रहण – त्वम् । ऋचा । 13 (50)

TS 6.1.2.5

जुहोति यज्ञस्योद्यत्या अनुष्टुप्-छन्दसाम्-मुदयच्छदित्या-
 हुस्तस्मादनुष्टुभा जुहोति यज्ञस्योद्यत्यै द्वादश वाथ्सबन्धान्युदयच्छ-
 न्नित्याहु-स्तस्माद्- द्वादशभि-र्वाथ्सबन्धविदो दीक्षयन्ति सा वा
 एषर्गनुष्टुग्-वागनुष्टुग्-यदेतयर्चा दीक्षयति वाचैवैनं सर्वया दीक्षयति
 विश्वे देवस्य नेतुरित्याह सावित्र्येतेन मर्तो वृणीत सख्य – [] 14

TS 6.1.2.5 - Padam

जुहोति । यज्ञस्य । उद्यत्या इत्युत् – यत्यै । अनुष्टुबित्यनु – स्तुप् ।
 छन्दसाम् । उदिति । अयच्छत् । इति । आहुः । तस्मात् ।
 अनुष्टुभेत्यनु – स्तुभा । जुहोति । यज्ञस्य । उद्यत्या इत्युत् – यत्यै ।
 द्वादश । वाथ्सबन्धानीति वाथ्स – बन्धानि । उदिति । अयच्छन् ।

इति॑ । आ॒हुः । तस्मा॑त् । द्वा॒द॒श॒भि॒रिति॑ द्वा॒द॒श॒भिः॑ । वा॒थ्स॒ब॒न्ध॒वि॒द
इति॑ वा॒थ्स॒ब॒न्ध – वि॒दः । दी॒क्ष॒य॒न्ति । सा । वै । ए॒षा । ऋ॒क् ।
अ॒नु॒ष्टु॒गि॒त्यनु॑ – स्तुक् । वाक् । अ॒नु॒ष्टु॒गि॒त्यनु॑ – स्तुक् । यत् ।
ए॒तया॑ । ऋ॒चा । दी॒क्ष॒य॒ति । वा॒चा । ए॒व । ए॒नम् । स॒र्व॒या ।
दी॒क्ष॒य॒ति । वि॒श्वे॑ । दे॒व॒स्य॑ । ने॒तुः । इति॑ । आ॒ह । सा॒वि॒त्री । ए॒तेन॑ ।
म॒र्तः । वृ॒णीत॑ । स॒ख्यम् । 14 (50)

TS 6.1.2.6

–मि॒त्याह॑ पि॒तृदे॒वत्यै॑तेन॒ वि॒श्वे रा॒य इ॒षुद्ध्य॑सी॒त्याह॑ वै॒श्वदे॒व्यै॑तेन॒ द्यु॒म्नं
वृ॒णीत॑ पु॒ष्यस॑ इ॒त्याह॑ पौ॒ष्ये॑तेन॒ सा वा ए॒षर्ष॑सर्वदे॒वत्या॑ यदे॒तय॑र्चा
दी॒क्ष॒य॒ति स॒र्वाभि॑रे॒वैनं॑ दे॒वता॑भिर्दी॒क्ष॒य॒ति स॒प्ताक्ष॑रं प्रथ॒मं
प॒द॒म॒ष्टाक्ष॑राणि त्री॒णि या॒नि त्री॒णि ता॒न्यष्टा॑वुप॒ यन्ति॑ या॒नि
च॒त्वारि॑ ता॒न्यष्टौ॑ यद॒ष्टाक्ष॑रा तेन – [] 15

TS 6.1.2.6 - Padam

इति॑ । आ॒ह । पि॒तृदे॒वत्यै॑ति॒ पितृ॑ – दे॒वत्या॑ । ए॒तेन॑ । वि॒श्वे॑ । रा॒यः ।
इ॒षुद्ध्य॑सि । इति॑ । आ॒ह । वै॒श्वदे॒वीति॑ वै॒श्वदे॒वी । ए॒तेन॑ । द्यु॒म्नम् ।
वृ॒णीत॑ । पु॒ष्यसे॑ । इति॑ । आ॒ह । पौ॒ष्णी । ए॒तेन॑ । सा । वै । ए॒षा ।

ऋक् । सर्वदेवत्येति सर्व – देवत्या ॥ यत् । एतया ॥ ऋचा ।
 दीक्षयति । सर्वाभिः । एव । एनम् । देवताभिः । दीक्षयति ।
 सप्ताक्षरमिति सप्त – अक्षरम् । प्रथमम् । पदम् ।
 अष्टाक्षराणीत्यष्टा – अक्षराणि । त्रीणि । यानि । त्रीणि । तानि । अष्टौ ।
 उपेति । यन्ति । यानि । चत्वारि । तानि । अष्टौ । यत् ।
 अष्टाक्षरेत्यष्टा – अक्षरा । तेन । 15 (50)

TS 6.1.2.7

गायत्री यदेकादशाक्षरा तेन त्रिष्टुग्यद् द्वादशाक्षरा तेन जगती
 सा वा एषर्षर्षाणि छन्दाँसि यदेतयर्चा दीक्षयति सर्वेभिरेवैनं
 छन्दोभिर्दीक्षयति सप्ताक्षरं प्रथमं पदं सप्तपदा शक्वरी पशवः
 शक्वरी पशूनेवाव रुन्ध एकस्मादक्षरादनाप्तं प्रथमं पदं
 तस्माद्-यद्-वाचोऽनाप्तं तन्मनुष्या उप जीवन्ति पूर्णया जुहोति ()
 पूर्ण इव हि प्रजापतिः प्रजापतेराप्त्यै न्यूनया जुहोति न्यूनाद्धि
 प्रजापतिः प्रजा असृजत प्रजानाँ सृष्ट्यै ॥ 16

TS 6.1.2.7 - Padam

गा॒य॒त्री । यत् । ए॒का॒द॒शाक्ष॑रेत्ये॒का॒द॒श – अक्ष॑रा । तेन॑ । त्रि॒ष्टुक् ।
यत् । द्वा॒द॒शाक्ष॑रेति द्वा॒द॒श – अक्ष॑रा । तेन॑ । जग॑ती । सा । वै ।
ए॒षा । ऋक् । सर्वा॑णि । छन्दा॑सि । यत् । ए॒तया॑ । ऋ॒चा । दी॒क्षय॑ति ।
सर्वे॑भिः । ए॒व । ए॒नम् । छन्दा॑भिरिति छन्दः – भिः । दी॒क्षय॑ति ।
स॒प्ताक्ष॑रमिति स॒प्त – अक्ष॑रम् । प्र॒थमम् । प॒दम् । स॒प्तप॑देति
स॒प्त – प॒दा । शक्व॑री । प॒शवः॑ । शक्व॑री । प॒शून् । ए॒व । अवे॑ति ।
रु॒न्धे । ए॒कस्मा॑त् । अक्ष॑रात् । अ॒नाप्त॑म् । प्र॒थमम् । प॒दम् । तस्मा॑त् ।
यत् । वा॒चः । अ॒नाप्त॑म् । तत् । म॒नुष्याः॑ । उपे॑ति । जी॒वन्ति॑ ।
पूर्णा॑या । जु॒होति॑ () । पूर्णः॑ । इ॒व । हि । प्र॒जाप॑तिरिति प्र॒जा-प॑तिः ।
प्र॒जाप॑तेरिति प्र॒जा-प॑तेः । आप्त्यै॑ । न्यू॒नये॑ति नि-ऊ॒नया॑ । जु॒होति॑ ।
न्यू॒नादि॑ति नि – ऊ॒नात् । हि । प्र॒जाप॑तिरिति प्र॒जा – प॑तिः ।
प्र॒जा इति॑ प्र – जाः । अ॒सृज॑त । प्र॒जाना॑मिति प्र-जा॒नाम् ।
सृष्ट्यै॑ ॥ 16 (65)

(अ॒ग्नये॑ – ता – वृ॒धात्वृ॑ – चा – स॒ख्यं – तेन॑ – जुहोति॑ –
पञ्चद॑श च) (A2)

TS 6.1.3.1

ऋ॒ख् सा॒मे वै दे॒वेभ्यो॑ य॒ज्ञाया॑ऽति॒ष्ठमा॒ने कृ॒ष्णो रू॒पं कृ॒त्वा –
ऽप॒क्रम्या॑ति॒ष्ठतां॑ तेऽम॒न्यन्त॑ यं वा इ॒मे उपा॑व॒थ्स्य॒तः स इ॒दं
भवि॑ष्य॒तीति॑ ते उपा॒मन्त्र॑यन्त॒ ते अ॒होरा॒त्रयो॑ – म॒हिमा॑न – म॒पनि॑धाय
दे॒वानु॑पाव॒र्तेता॒मेष॒ वा ऋ॒चो वर्णो॑ यच्छु॒क्लं कृ॒ष्णाजि॑नस्यैष॒ साम्नो॑
यत् कृ॒ष्णमृ॑ख्सा॒मयोः शिल्पे॑ स्थ इ॒त्याह॑र्खा॒मे ए॒वाव

रुन्ध ए॒ष – [] 17

TS 6.1.3.1 - Padam

ऋ॒ख्सा॒मे इत्यृ॑क् – सा॒मे । वै । दे॒वेभ्यः॑ । य॒ज्ञाय॑ । अ॒ति॒ष्ठमा॒ने इति॑ ।
कृ॒ष्णः । रू॒पम् । कृ॒त्वा । अ॒प॒क्रम्ये॑त्यप – क्र॒म्य । अ॒ति॒ष्ठता॑म् । ते ।
अ॒म॒न्यन्त॑ । यम् । वै । इ॒मे इति॑ । उपा॑व॒थ्स्य॒त इत्यु॑प – आ॒व॒थ्स्य॒तः ।
सः । इ॒दम् । भवि॑ष्यति । इति॑ । ते इति॑ । उपेति॑ । अ॒म॒न्त्र॑यन्त ।
ते इति॑ । अ॒हो॒रा॒त्रयो॑रित्यहः – रा॒त्रयोः॑ । म॒हिमा॑नम् ।

अ॒प॒नि॒धा॒येत्य॑प – नि॒धा॒य॑ । दे॒वा॒न् । उ॒पा॒व॒र्ते॒ता॒मित्यु॑प-आ॒व॒र्ते॒ता॒म् ।
ए॒षः । वै । ऋ॒चः । वर्णः॑ । यत् । शु॒क्ल॑म् । कृ॒ष्णा॒जि॒न॒स्येति॑
कृ॒ष्ण – अ॒जि॒न॒स्य॑ । ए॒षः । सा॒म्नः॑ । यत् । कृ॒ष्ण॑म् ।
ऋ॒ख॒सा॒मयो॒रित्यृ॑क् – सा॒मयोः॑ । शिल्पे॑ इति । स्थः॑ । इति॑ । आ॒ह॒ ।
ऋ॒ख॒सा॒मे इत्यृ॑क् – सा॒मे । ए॒व । अ॒वेति॑ । रु॒न्धे । ए॒षः । 17 (50)

TS 6.1.3.2

वा अ॒हो वर्णो॑ यच्छु॒क्लं कृ॒ष्णा॒जि॒न॒स्यैष॑ रा॒त्रिया॑ यत् कृ॒ष्णं
यदे॒वैनयो॑स्तत्र न्य॒क्तं तदे॒वाव॑ रु॒न्धे कृ॒ष्णा॒जि॒नेन॑ दीक्षयति
ब्र॒ह्म॒णो वा ए॒तद्-रूपं॑ यत् कृ॒ष्णा॒जि॒नं ब्र॒ह्म॒णैवैनं॑ दीक्षयती॒मां
धिय॑श्च॒ शिक्ष॑माणस्य दे॒वेत्या॑ह यथा॒यजु॑रे॒वैतद्-गर्भो॑ वा ए॒ष
यद्-दी॒क्षित॑ उ॒ल्बं वा॒सः प्रो॑र्णु॒ते तस्मा॑द् – [] 18

TS 6.1.3.2 - Padam

वै । अ॒हः । वर्णः॑ । यत् । शु॒क्ल॑म् । कृ॒ष्णा॒जि॒न॒स्येति॑
कृ॒ष्ण – अ॒जि॒न॒स्य॑ । ए॒षः । रा॒त्रियाः॑ । यत् । कृ॒ष्ण॑म् । यत् । ए॒व ।
ए॒नयोः॑ । तत्र॑ । न्य॒क्तमि॑ति नि-अ॒क्तम् । तत् । ए॒व । अ॒वेति॑ । रु॒न्धे ।

कृ॒ष्णाजि॒नेने॑ति॒ कृष्ण॑-अजि॒नेन॑ । दी॒क्षय॑ति । ब्र॒ह्मणः॑ । वै । ए॒तत् ।
रूप॑म् । यत् । कृ॒ष्णाजि॒नमि॑ति॒ कृष्ण॑ - अजि॒नम् । ब्र॒ह्मणा॑ । ए॒व ।
ए॒नम् । दी॒क्षय॑ति । इ॒माम् । धि॒यम् । शि॒क्षमा॑णस्य । दे॒व । इति॑ ।
आ॒ह । यथा॑यजु॒रिति॑ यथा - यजुः॑ । ए॒व । ए॒तत् । गर्भः॑ । वै ।
ए॒षः । यत् । दी॒क्षितः॑ । उ॒ल्बम् । वा॒सः । प्रेति॑ । ऊ॒र्णुते॑ ।

तस्मा॑त् । 18 (50)

TS 6.1.3.3

गर्भाः॑ प्रावृ॒ता जा॑यन्ते न पु॒रा सोम॑स्य क्र॒यादपो॑र्णीत॒ यत् पु॒रा
सोम॑स्य क्र॒यादपो॑र्णीत॒ गर्भाः॑ प्र॒जानां॑ प॒रापा॑तुकाः स्युः क्री॒ते
सोमेऽपो॑र्णुते जा॑यत ए॒व तदथो॑ यथा वसी॑याꣳ सं प्रत्यपो॑र्णुते
तादृ॑गेव तदङ्गि॑रसः सुव॒र्गं लो॒कं य॑न्त ऊ॒र्जं व्य॑भजन्त
ततो॑ यदत्य॑शिष्यत॒ ते श॒रा अ॑भवन्नू॒र्वे श॒रा यच्छ॑रमयी - [] 19

TS 6.1.3.3 - Padam

गर्भाः॑ । प्रावृ॒ताः । जा॑यन्ते । न । पु॒रा । सोम॑स्य । क्र॒यात् । अपेति॑ ।
ऊ॒र्णीत॑ । यत् । पु॒रा । सोम॑स्य । क्र॒यात् । अपो॑र्णीतेत्यप-ऊ॒र्णीत॑ ।
गर्भाः॑ । प्र॒जाना॑मिति॒ प्र - जाना॑म् । प॒रापा॑तुका इति॒ परा॑-पातुकाः ।

स्युः । क्री॒ते । सोमै॑ । अपे॒ति । ऊ॒र्णु॒ते । जा॒यते । ए॒व । तत् ।
अथो॒ इति॑ । यथा॑ । वसी॒या॒ऽसम् । प्र॒त्यपो॒र्णु॒त इति॑ प्र॒ति-अपो॒र्णु॒ते ।
तादृ॒क् । ए॒व । तत् । अङ्गि॑रसः । सु॒वर्ग॑मिति॒ सुवः॑ – गम् ।
लो॒कम् । यन्तः॑ । ऊ॒र्जम् । वी॒ति । अ॒भज॑न्त । ततः॑ । यत् ।
अत्य॑शिष्यतेत्यति – अशि॑ष्यत । ते । श॒राः । अ॒भव॑न् । ऊ॒र्क् । वै ।
श॒राः । यत् । श॒रम॑यीति॒ शर॑ – मयी॑ । 19 (50)

TS 6.1.3.4

मे॒खला॑ भव॒त्यूर्ज॑मे॒वाव॑ रुन्धे म॒द्ध्यतः॑ सं॒नह्य॑ति म॒द्ध्यत॑ ए॒वास्मा॑
ऊ॒र्जं द॑धाति तस्मा॑न्म॒द्ध्यत॑ ऊ॒र्जा भु॑ञ्जत ऊ॒र्ध्वं वै॑ पु॒रुष॑स्य
नाभ्यै॑ मे॒द्ध्य-मवा॑चीन-ममे॒द्ध्यं य॑न्म॒द्ध्यतः॑ सं॒नह्य॑ति मे॒द्ध्यं
चै॒वास्या॑मे॒द्ध्यं च॑ व्याव॑र्तयतीन्द्रो वृ॒त्राय॑ वज्रं प्रा॒हर॑त् स त्रे॒धा
व्य॑भव॒त् स्फ्य॑स्तृतीयं॒ रथ॑स्तृतीयं॒ यूप॑स्तृतीयं – [] 20

TS 6.1.3.4 - Padam

मे॒खला॑ । भव॑ति । ऊ॒र्जम् । ए॒व । अवे॑ति । रुन्धे॑ । म॒द्ध्यतः॑ ।
समि॑ति । न॒ह्यति॑ । म॒द्ध्यतः॑ । ए॒व । अ॒स्मै । ऊ॒र्जम् । द॑धाति ।

तस्मात् । मद्ध्यतः । ऊर्जा । भुञ्जते । ऊर्ध्वम् । वै । पुरुषस्य ।
 नाभ्यै । मेद्ध्यम् । अवाचीनम् । अमेद्ध्यम् । यत् । मद्ध्यतः ।
 सन्नह्यतीति सं – नह्यति । मेद्ध्यम् । च । एव । अस्य ।
 अमेद्ध्यम् । च । व्यावर्तयतीति वि-आवर्तयति । इन्द्रः । वृत्राय ।
 वज्रम् । प्रेति । अहरत् । सः । त्रेधा । वीति । अभवत् । स्म्यः ।
 तृतीयम् । रथः । तृतीयम् । यूपः । तृतीयम् । 20 (50)

TS 6.1.3.5

यैऽन्तः शरा अशीर्यन्त ते शरा अभवन् तच्छराणां शरत्वं
 वज्रो वै शराः क्षुत् खलु वै मनुष्यस्य भ्रातृव्यो यच्छरमयी
 मेखला भवति वज्रेणैव साक्षात् क्षुधं भ्रातृव्यं मद्ध्यतोऽप हते
 त्रिवृद्-भवति त्रिवृद्वै प्राणस्त्रिवृतमेव प्राणं मद्ध्यतो यजमाने
 दधाति पृथ्वी भवति रज्जूनां व्यावृत्यै मेखलया यजमानं दीक्षयति
 योक्त्रेण पत्नीं मिथुनत्वाय – [] 21

TS 6.1.3.5 - Padam

ये । अ॒न्त॒श॒रा इ॒त्य॒न्तः-श॒राः । अ॒शी॒र्य॒न्त । ते । श॒राः । अ॒भ॒व॒न् ।
तत् । श॒रा॒णाम् । श॒र॒त्व॒मि॒ति श॒र-त्व॒म् । व॒ज्रः । वै । श॒राः । क्षु॒त् ।
ख॒लु । वै । म॒नु॒ष्य॒स्य । भ्रा॒तृ॒व्यः । यत् । श॒र॒म॒यीति॑ श॒र - म॒यी ।
मे॒ख॒ला । भ॒व॒ति । व॒ज्रे॒ण । ए॒व । सा॒क्षा॒दि॒ति स-अ॒क्षात् । क्षु॒ध॒म् ।
भ्रा॒तृ॒व्य॒म् । म॒द्ध्य॒तः । अ॒पे॒ति । ह॒ते । त्रि॒वृ॒दि॒ति त्रि - वृ॒त् ।
भ॒व॒ति । त्रि॒वृ॒दि॒ति त्रि - वृ॒त् । वै । प्रा॒ण इ॒ति प्र - अ॒नः ।
त्रि॒वृ॒त॒मि॒ति त्रि - वृ॒त॒म् । ए॒व । प्रा॒ण॒मि॒ति प्र - अ॒न॒म् । म॒द्ध्य॒तः ।
य॒ज॒मा॒ने । द॒धा॒ति । पृ॒थ्वी । भ॒व॒ति । र॒ज्जू॒नाम् ।
व्या॒वृ॒त्या इ॒ति वि - आ॒वृ॒त्यै । मे॒ख॒ल॒या । य॒ज॒मा॒न॒म् । दी॒क्ष॒य॒ति ।
यो॒क्त्रे॒ण । प॒त्नी॒म् । मि॒थु॒न॒त्वा॒येति॑ मि॒थु॒न - त्वा॒य । 21 (50)

TS 6.1.3.6

य॒ज्ञो द॒क्षि॒णाम॒भ्य॒द्ध्य॒यत् तां॑ स॒म॒भ॒वत् तदिन्द्रो॑-ऽचा॒य॒थ्
सोऽम॒न्य॒त यो वा इ॒तो ज॒नि॒ष्य॒ते स इ॒दं भ॒वि॒ष्य॒तीति॑ तां प्रा॒वि॒श॒त्
तस्या॑ इ॒न्द्र ए॒वाजा॒य॒त सोऽम॒न्य॒त यो वै म॒दि॒तो ऽप॒रो ज॒नि॒ष्य॒ते

स इ॒दं भ॒विष्य॑तीति॒ तस्या॑ अनु॒मृश्य॑ योनि॒मा-ऽच्छि॑न॒त् सा
सू॒तव॑शाऽभ॒वत् तत् सू॒तव॑शायै॒ जन्म॑ – [] 22

TS 6.1.3.6 - Padam

य॒ज्ञः । दक्षि॑णाम् । अ॒भीति॑ । अ॒द्ध्याय॑त् । ताम् । समि॑ति ।
अ॒भ॒वत् । तत् । इन्द्रः॑ । अ॒चाय॑त् । सः । अ॒मन्य॑त । यः । वै ।
इतः॑ । ज॒निष्य॑ते॒ ॥ सः । इ॒दम् । भ॒विष्य॑ति । इति॑ । ताम् । प्रेति॑ ।
अ॒विश॑त् । तस्याः॑ । इन्द्रः॑ । ए॒व । अ॒जाय॑त । सः । अ॒मन्य॑त । यः ।
वै । मत् । इतः॑ । अ॒परः । ज॒निष्य॑ते॒ ॥ सः । इ॒दम् । भ॒विष्य॑ति ।
इति॑ । तस्याः॑ । अनु॒मृश्ये॑त्यनु – मृश्य॑ । योनि॑म् । एति॑ ।
अ॒च्छि॑न॒त् । सा । सू॒तव॑शेति॒ सूत॑ – व॒शा । अ॒भ॒वत् । तत् ।
सू॒तव॑शाया॒ इति॑ सू॒त – व॒शायै॑ । जन्म॑ । 22 (50)

TS 6.1.3.7

तां॑ ह॒स्ते न्य॑वेष्टय॒त् तां मृ॑गेषु॒ न्यद॑धा॒त् सा कृ॑ष्णविषा॒णा-
ऽभ॑वदिन्द्र॒स्य योनि॑रसि॒ मा मा हि॑सीरि॒ति कृ॑ष्णविषा॒णां प्र य॑च्छति॒
सयो॑निमे॒व य॒ज्ञं करो॑ति॒ सयो॑निं॒ दक्षि॑णां॒ सयो॑निमिन्द्रं॑

सयो॒नित्वा॑य॒ कृ॒ष्यै॑ त्वा॒ सु॒स॒स्या॒या॒ इत्या॑ह॒ तस्मा॑द॒कृ॒ष्टप॒च्या॒ ओष॑धयः
पच्य॑न्ते सु॒पि॒प्प॒लाभ्य॑स्त्वौष॒धीभ्य॑ इत्या॑ह॒ तस्मा॑दोष॒धयः॑ फलं
गृह्ण॑न्ति यद्ध॒स्तेन॑ – [] 23

TS 6.1.3.7 - Padam

ताम् । ह॒स्ते॑ । नी॒ति॑ । अ॒वे॒ष्टय॑त । ताम् । मृ॒गेषु॑ । नी॒ति॑ । अ॒द॒धात् ।
सा । कृ॒ष्णवि॒षाणे॑ति॒ कृ॒ष्ण – वि॒षाणा॑ । अ॒भव॑त् । इन्द्र॑स्य । यो॒निः ।
अ॒सि॑ । मा । मा । हि॒॒सीः॑ । इति॑ । कृ॒ष्णवि॒षाणा॑मिति॒
कृ॒ष्ण – वि॒षाणा॑म् । प्रेति॑ । यच्छ॑ति । सयो॒निमि॑ति॒ स – यो॒निम् ।
ए॒व । य॒ज्ञम् । क॒रोति॑ । सयो॒निमि॑ति॒ स – यो॒निम् । दक्षि॑णाम् ।
सयो॒निमि॑ति॒ स – यो॒निम् । इन्द्र॑म् । सयो॒नित्वा॑येति॒ सयो॒नि-त्वा॑य ।
कृ॒ष्यै॑ । त्वा॒ । सु॒स॒स्या॒या॒ इति॑ सु – स॒स्यायै॑ । इति॑ । आ॒ह ।
तस्मा॑त् । अ॒कृ॒ष्टप॒च्या॒ इत्य॑कृ॒ष्ट – प॒च्याः । ओष॑धयः । पच्य॑न्ते ।
सु॒पि॒प्प॒लाभ्य॑ इति॑ सु – पि॒प्प॒लाभ्यः॑ । त्वा॒ ।

ओष॑धी॒भ्य इत्योष॑धि – भ्यः॒ । इति॑ । आ॒ह॒ । तस्मा॑त् । ओष॑धयः ।

फ॒लम् । गृ॒ह्णन्ति॑ । यत् । हस्ते॑न । 23 (50)

TS 6.1.3.8

कण्डू॑येत॒ पाम॑नं॒ भावु॑काः प्र॒जाः स्यु॑र्यथ् स्मये॑त नग्नं॒ भावु॑काः
कृष्ण॑विषा॒णया॑ कण्डू॑यतेऽपि॒गृह्य॑ स्मय॑ते प्र॒जानां॑ गोपी॒थाय॒ न पु॒रा
दक्षि॑णाभ्यो॒ नेतौः॑ कृष्ण॑विषा॒णामव॑ चृ॒तेद्यत् पु॒रा दक्षि॑णाभ्यो॒ नेतौः॑
कृष्ण॑विषा॒णामव॑ चृ॒तेद्योनिः॑ प्र॒जानां॑ परा॒पातु॑का स्यान्नी॒तासु॑ दक्षि॑णासु
चात्वा॑ले कृष्ण॑विषा॒णां प्रा॑स्यति योनि॑र्वै यज्ञ॑स्य चात्वा॑लं योनिः॑
कृष्ण॑विषा॒णा योना॑वेव योनिं॑ दधाति यज्ञ॑स्य सयो॑नित्वाय ॥ 24

TS 6.1.3.8 - Padam

कण्डू॑येत । पा॒म॒न॒म्भा॒वु॒का इति॑ पा॒म॒न॒म् – भा॒वु॒काः ।
प्र॒जा इति॑ प्र – जाः । स्युः॑ । यत् । स्मये॑त । नग्न॑म्भा॒वु॒का इति॑
नग्न॑म् – भा॒वु॒काः । कृष्ण॑विषा॒णयेति॑ कृष्ण॑-विषा॒णया॑ । कण्डू॑यते ।
अपि॒गृह्ये॑त्यपि – गृह्य॑ । स्मय॑ते । प्र॒जाना॑मिति प्र – जाना॑म् ।

गो॒पी॒थाय॑ । न । पु॒रा । दक्षि॑णाभ्यः । ने॒तौः॑ । कृ॒ष्णवि॒षाणा॑मिति
 कृ॒ष्ण – वि॒षाणा॑म् । अवे॑ति । चृ॒तेत् । यत् । पु॒रा । दक्षि॑णाभ्यः ।
 ने॒तौः॑ । कृ॒ष्णवि॒षाणा॑मिति कृ॒ष्ण-वि॒षाणा॑म् । अव॑चृतेदित्यव-चृ॒तेत् ।
 योनिः॑ । प्र॒जाना॑मिति प्र – जाना॑म् । प॒रापा॑तुकेति प॒रा – पा॑तुका ।
 स्यात् । नी॒तासु॑ । दक्षि॑णासु । चा॒त्वाले॑ । कृ॒ष्णवि॒षाणा॑मिति
 कृ॒ष्ण – वि॒षाणा॑म् । प्रेति॑ । अ॒स्यति॑ । योनिः॑ । वै । य॒ज्ञस्य॑ ।
 चा॒त्वाल॑म् । योनिः॑ । कृ॒ष्णवि॒षाणे॑ति कृ॒ष्ण – वि॒षाणा॑ । यो॒नौ ।
 ए॒व । यो॒निम् । द॒धाति॑ । य॒ज्ञस्य॑ ।
 स॒योनि॑त्वायेति स॒योनि – त्वाय॑ ॥ 24 (48)

(रु॒न्ध ए॒ष – तस्मा॑ – च्छ॒रम॑यी – यू॒पस्तृ॑तीयं – मिथु॒नत्वाय॑ –
 ज॒न्म – ह॒स्तेना॑ – ऽष्टा॑च॒त्वारि॒ंशच्च॑) (A3)

TS 6.1.4.1

वा॒ग्वै दे॒वेभ्यो॑ ऽपा॒क्राम॑द्-य॒ज्ञाया॑तिष्ठमा॒ना सा व॒नस्प॑तीन् प्रावि॑श॒त्
 सैषा वा॒ग्वन॑स्पतिषु वदति॑ या दु॒न्दुभौ॑ या तू॒णवे॑ या वी॒णायां॑
 यद्-दी॑क्षितदण्डं प्र॒यच्छ॑ति वा॒चमे॒वाव रु॒न्ध औदु॑ंबरो भवत्यू॒र्वा

उ॒दु॒म्ब॒र ऊ॒र्ज॒मे॒वा॒व रु॒न्धे॒ मुखे॒न॒ सं॒मि॒तो भ॒वति॑ मुख॒त ए॒वास्मा॒
ऊ॒र्ज द॒धाति॑ तस्मा॒न् मुख॒त ऊ॒र्जा भु॒ञ्जते॑ – [] 25

TS 6.1.4.1 - Padam

वाक् । वै । दे॒वेभ्यः॑ । अ॒पेति॑ । अ॒क्राम॒त् । य॒ज्ञाय॑ । अति॑ष्ठ॒माना ।
सा । व॒नस्प॑तीन् । प्रेति॑ । अ॒वि॒श॒त् । सा । ए॒षा । वाक् । व॒नस्प॑तिषु ।
व॒दति॑ । या । दु॒न्दु॒भौ । या । तू॒णवे॑ । या । वी॒णा॒याम् । यत् ।
दी॒क्षित॑दण्डमि॒ति दी॒क्षित॑-दण्डम् । प्र॒यच्छ॑तीति प्र-यच्छति । वाच॑म् ।
ए॒व । अ॒वेति॑ । रु॒न्धे । औ॒दु॒म्ब॒रः । भ॒वति॑ । ऊ॒र्क् । वै । उ॒दु॒म्ब॒रः ।
ऊ॒र्जम् । ए॒व । अ॒वेति॑ । रु॒न्धे । मुखे॒न । स॒मि॒त इति॑ सं – मि॒तः ।
भ॒वति॑ । मुख॒तः । ए॒व । अ॒स्मै । ऊ॒र्जम् । द॒धाति॑ । तस्मा॑त् ।
मुख॒तः । ऊ॒र्जा । भु॒ञ्जते॑ । 25 (50)

TS 6.1.4.2

क्री॒ते सो॒मे मै॒त्राव॑रुणा॒य द॒ण्डं प्र॑ यच्छति मै॒त्राव॑रुणो हि पु॒रस्ता॑ –
दृ॒त्वि॒ग्भ्यो वाचं॑ वि॒भज॑ति ता॒मृ॒त्वि॒जो य॑ज॒माने॑ प्र॒ति ष्ठा॑पयन्ति स्वाहा
य॒ज्ञं म॒न॒से॒त्याह॑ म॒न॒सा हि॑ पु॒रुषो॑ य॒ज्ञम॑भि॒गच्छ॑ति स्वाहा

द्या॒वापृ॑थि॒वीभ्या॑ – मि॒त्याह॑ द्या॒वापृ॑थि॒व्योर्हि॑ य॒ज्ञः स्वा॒होरो॒र-
 न्तरि॑क्षा – दि॒त्याहा॑न्तरि॒क्षे हि॑ य॒ज्ञः स्वा॒हा य॒ज्ञं वा॑ता॒दा र॒भ
 इ॒त्याहा॑यं – [] 26

TS 6.1.4.2 - Padam

क्री॒ते । सोमै॑ । मै॒त्राव॑रु॒णाय॑ेति॒ मैत्रा॑ – व॒रुणाय॑ । द॒ण्डम् । प्रेति॑ ।
 य॒च्छति॑ । मै॒त्राव॑रु॒ण इति॑ मैत्रा॑ – व॒रुणः॑ । हि॑ । पु॒रस्ता॑त् ।
 ऋ॒त्विग्भ्य॑ इत्यृ॒त्विक् – भ्यः॑ । वाच॑म् । वि॒भज॑तीति॒ वि – भज॑ति ।
 ता॒म् । ऋ॒त्विजः॑ । यज॑माने । प्रतीति॑ । स्था॒पय॑न्ति । स्वा॒हा । य॒ज्ञम् ।
 मन॑सा । इति॑ । आ॒ह । मन॑सा । हि॑ । पु॒रुषः॑ । य॒ज्ञम् ।
 अ॒भिग॑च्छतीत्य॒भि – ग॑च्छति । स्वा॒हा ।
 द्या॒वापृ॑थि॒वीभ्या॑मिति॒ द्यावा॑ – पृ॒थि॒वीभ्या॑म् । इति॑ । आ॒ह ।
 द्या॒वापृ॑थि॒व्योरिति॑ द्यावा॑-पृ॒थि॒व्योः । हि॑ । य॒ज्ञः । स्वा॒हा । उ॒रोः ।
 अ॒न्तरि॑क्षात् । इति॑ । आ॒ह । अ॒न्तरि॑क्षे । हि॑ । य॒ज्ञः । स्वा॒हा ।
 य॒ज्ञम् । वा॑तात् । एति॑ । र॒भे । इति॑ । आ॒ह । अ॒यम् । 26 (50)

TS 6.1.4.3

ॐ॒वा॒व॒ यः॑ प॒व॒ते॒ स॒ य॒ज्ञ॒स्त॒मे॒व॒ सा॒क्षा॒दा॒ र॒भ॒ते॒ मु॒ष्टी॑ क॒रो॒ति॑ वा॒चं॑
य॒च्छ॒ति॑ य॒ज्ञ॒स्य॒ धृ॒त्या॒ अ॒दी॒क्षि॒ष्टा॒यं॑ ब्रा॒ह्म॒ण॒ इति॑ त्रि॒रु॒पा॒ञ्च॒श्वा॒ह॒
दे॒वे॒भ्य॑ ए॒वैनं॑ प्रा॒ऽऽह॒ त्रि॒रु॒च्चै॒रु॒भयै॑भ्य॒ ए॒वैनं॑ दे॒वम॒नु॒ष्ये॒भ्यः॑
प्रा॒ऽऽह॒ न॒ पु॒रा॒ नक्ष॑त्रेभ्यो॒ वा॒चं॑ वि॒ सृ॒जे॒द्-यत्पु॒रा॒ नक्ष॑त्रेभ्यो॒
वा॒चं॑ वि॒सृ॒जे॒द्-य॒ज्ञं॑ वि॒च्छि॒न्द्या॑ - [] 27

TS 6.1.4.3 - Padam

वा॒व॒ । यः॑ । प॒व॒ते॒ । सः॑ । य॒ज्ञः॑ । तम् । ए॒व॒ । सा॒क्षा॒दि॒ति॑
स-अ॒क्षा॒त् । ए॒ति॑ । र॒भ॒ते॒ । मु॒ष्टी॑ इति॑ । क॒रो॒ति॑ । वा॒चम् । य॒च्छ॒ति॑ ।
य॒ज्ञ॒स्य॑ । धृ॒त्यै॑ । अ॒दी॒क्षि॒ष्ट॑ । अ॒यम् । ब्रा॒ह्म॒णः॑ । इति॑ । त्रिः॑ ।
उ॒पा॒ञ्चि॒त्यु॒प॑ - अ॒ञ्शु॑ । आ॒ह॒ । दे॒वे॒भ्यः॑ । ए॒व॒ । ए॒नम् । प्रेति॑ ।
आ॒ह॒ । त्रिः॑ । उ॒च्चैः॑ । उ॒भयै॑भ्यः । ए॒व॒ । ए॒नम् । दे॒वम॒नु॒ष्ये॒भ्य॑ इति॑
दे॒व॒ - म॒नु॒ष्ये॒भ्यः॑ । प्रेति॑ । आ॒ह॒ । न॒ । पु॒रा॒ । नक्ष॑त्रेभ्यः । वा॒चम् ।
वीति॑ । सृ॒जे॒त् । यत् । पु॒रा॒ । नक्ष॑त्रेभ्यः । वा॒चम् ।
वि॒सृ॒जे॒दि॒ति॑ वि॒ - सृ॒जे॒त् । य॒ज्ञम् । वीति॑ । छि॒न्द्या॒त् । 27 (50)

TS 6.1.4.4

–दु॒दि॒तेषु॑ नक्ष॒त्रेषु॑ व्र॒तं कृ॑णु॒तेति॑ वाचं॒ वि सृ॑जति॒ यज्ञ॑व्र॒तो वै
दी॒क्षितो॑ य॒ज्ञमे॒वाभि॑ वाचं॒ वि सृ॑जति॒ यदि॑ वि॒सृजे॑द्–वै॒ष्णवी॑मृ॒चम॑नु
ब्रू॒याद्–य॒ज्ञो वै वि॑ष्णु॒र्यज्ञे॑नै॒व य॒ज्ञं सं त॑नोति॒ दैवीं॑ धि॒यं म॑नामह
इत्या॑ह य॒ज्ञमे॒व तन्म॑दयति॒ सुपा॑रा नो॒ अस॑द्व॒श इत्या॑ह व्यु॒ष्टिमे॒वाव
रु॒न्धे – [] 28

TS 6.1.4.4 - Padam

उ॒दि॒तेष्वि॒त्युत् – इ॒तेषु॑ । नक्ष॒त्रेषु॑ । व्र॒तम् । कृ॑णु॒त । इति॑ । वाच॑म् ।
वीति॑ । सृ॒जति॑ । य॒ज्ञव्र॑त इति॑ य॒ज्ञ–व्र॑तः । वै । दी॒क्षितः॑ । य॒ज्ञम् ।
ए॒व । अ॒भीति॑ । वाच॑म् । वीति॑ । सृ॒जति॑ । यदि॑ ।
वि॒सृजे॑दिति॑ वि – सृ॒जेत् । वै॒ष्णवी॑म् । ऋ॒चम् । अ॒न्विति॑ । ब्रू॒यात् ।
य॒ज्ञः । वै । वि॑ष्णुः । य॒ज्ञेन॑ । ए॒व । य॒ज्ञम् । स॒मिति॑ । त॒नोति॑ ।
दैवी॑म् । धि॒यम् । म॒नाम॑हे । इति॑ । आ॒ह । य॒ज्ञम् । ए॒व । तत् ।
म॒दय॑ति । सु॒पा॒रेति॑ सु – पा॒रा । नः॑ । अ॒सत् । व॒शे । इति॑ । आ॒ह ।
व्यु॒ष्टि॒मिति॑ वि – उ॒ष्टिम् । ए॒व । अ॒वेति॑ । रु॒न्धे । 28 (50)

TS 6.1.4.5

ब्रह्मवादिनो॑ वदन्ति॑ हो॒तव्यं॑ दी॒क्षितस्य॑ गृ॒हा(३) इ॒ न हो॒तव्या(३)मि॑ति
ह॒विर्वै॑ दी॒क्षितो॑ यज्जु॒हुयाद्-यज॑मानस्याव॒दाय॑ जुहुयाद्-यन्न
जुहुयाद्-य॒ज्ञप॑रुरन्तरि॒याद्ये॑ दे॒वा मनो॑जा॒ता मनो॑युज॒ इत्या॑ह प्रा॒णा
वै दे॒वा मनो॑जा॒ता मनो॑युज॒स्तेष्वे॒व प॑रोक्षं जुहोति॒ तन्ने॒व हु॑तं
ने॒वाहु॑तꣳ स्व॒पन्तं॑ वै दी॒क्षितꣳ रक्षाꣳसि॑ जिघाꣳसन्त्यग्निः- [] 29

TS 6.1.4.5 - Padam

ब्रह्मवादि॑न इति॑ ब्रह्म - वादि॑नः । वद॑न्ति । हो॒तव्यम् । दी॒क्षितस्य॑ ।
गृ॒हा(३) इ॒ न । हो॒तव्या(३)म् । इति॑ । ह॒विः । वै । दी॒क्षितः । यत् ।
जुहु॑यात् । यज॑मानस्य । अ॒वदा॑येत्यव - दा॑य । जुहु॑यात् । यत् । न ।
जुहु॑यात् । य॒ज्ञप॑रुरिति॑ य॒ज्ञ - प॑रुः । अ॒न्तः । इ॒यात् । ये । दे॒वाः ।
मनो॑जा॒ता इति॑ मनः - जा॒ताः । मनो॑युज॒ इति॑ मनः-युजः । इति॑ ।
आ॒ह । प्रा॒णा इति॑ प्र - अ॒नाः । वै । दे॒वाः । मनो॑जा॒ता इति॑
मनः - जा॒ताः । मनो॑युज॒ इति॑ मनः - युजः । तेषु॑ । ए॒व ।
प॑रोक्षमि॑ति प॒रः - अक्ष॑म् । जुहो॑ति । तत् । न । इ॒व । हु॑तम् । न ।

इ॒व । अ॒हु॒तम् । स्व॒प॒न्त॒म् । वै । दी॒क्षि॒तम् । रक्षा॑सि ।

जि॒घा॒स॒न्ति । अ॒ग्निः । 29 (50)

TS 6.1.4.6

ख॒लु वै रक्षो॑हा॒ग्ने त्व॑ सु जा॒गृ॒हि वय॑ सु म॒न्दि॒षी॒मही॒त्याहा॒ग्नि-
मे॒वाधि॑पां कृ॒त्वा स्व॑पि॒ति रक्ष॑साम॒पह॑त्या अ॒व्र॒त्यमि॑व वा ए॒ष क॑रोति
यो दी॒क्षि॒तः स्व॑पि॒ति त्व॑म॒ग्ने व्र॑त॒पा अ॒सी॒त्याहा॒ग्निर्वै दे॒वानां॑ व्र॒तप॑तिः
स ए॒वैनं॑ व्र॒तमा लं॑भयति दे॒व आ म॒र्त्ये॒ष्वेत्या॑ह दे॒वो – [] 30

TS 6.1.4.6 - Padam

ख॒लु । वै । रक्षो॑हेति रक्षः – हा । अ॒ग्ने । त्वम् । स्वि॒ति । जा॒गृ॒हि ।
वय॑म् । स्वि॒ति । म॒न्दि॒षी॒महि॑ । इति॑ । आ॒ह । अ॒ग्निम् । ए॒व ।
अ॒धि॒पा॒मित्य॑धि – पा॒म् । कृ॒त्वा । स्व॑पि॒ति । रक्ष॑साम् ।
अ॒पह॑त्या इत्य॑प – ह॒त्यै । अ॒व्र॒त्यम् । इ॒व । वै । ए॒षः । क॑रोति ।
यः । दी॒क्षि॒तः । स्व॑पि॒ति । त्वम् । अ॒ग्ने । व्र॑त॒पा इति॑ व्रत॒-पाः ।
अ॒सि । इति॑ । आ॒ह । अ॒ग्निः । वै । दे॒वाना॑म् ।
व्र॒तप॑तिरिति॑ व्रत॒ – प॒तिः । सः । ए॒व । ए॒नम् । व्र॒तम् । एति॑ ।

ल॒म्भ॒य॒ति॒ । दे॒वः॑ । ए॒ति॑ । म॒र्त्ये॑षु । ए॒ति॑ । इ॒ति॑ ।

आ॒ह॒ । दे॒वः॑ । 30 (50)

TS 6.1.4.7

ह्ये॒ष सन् म॒र्त्ये॑षु त्वं य॒ज्ञे॑ष्वी॒ड्य॒ इत्या॑है॒तꣳ हि॒ य॒ज्ञे॑ष्वी॒डते॑ऽप
वै दी॒क्षि॒तात् सु॒षुपु॑ष इन्द्रि॒यं दे॒वताः॑ क्राम॒न्ति वि॒श्वे दे॒वा अ॒भि
मा॒माऽव॑वृ॒त्र-न्नि॒त्या-हे॒न्द्रि॒येणै॒वैनं॑ दे॒वता॑भिः सं न॒यति॑ यदे॒तद्-य॒जुर्न
ब्रू॒याद्-या॒वत् ए॒व प॒शून् अ॒भि दी॒क्षेत् ता॒वन्तो॑ऽस्य प॒शवः॑

स्यू॒ रा॒स्वेय॑थ् - [] 31

TS 6.1.4.7 - Padam

हि । ए॒षः । सन् । म॒र्त्ये॑षु । त्वम् । य॒ज्ञे॑षु । ई॒ड्यः॑ । इ॒ति॑ । आ॒ह॒ ।
ए॒तम् । हि । य॒ज्ञे॑षु । ई॒डते॑ । अ॒पेति॑ । वै । दी॒क्षि॒तात् सु॒षुपु॑षः ।
इन्द्रि॒यम् । दे॒वताः॑ । क्राम॒न्ति । वि॒श्वे॑ । दे॒वाः । अ॒भीति॑ । मा॒म् ।
ए॒ति॑ । अ॒ववृ॒त्रन् । इ॒ति॑ । आ॒ह॒ । इन्द्रि॒येण॑ । ए॒व । ए॒नम् ।
दे॒वता॑भिः । स॒मिति॑ । न॒यति॑ । यत् । ए॒तत् । य॒जुः । न । ब्रू॒यात् ।

याव॑तः । ए॒व । प॒शून् । अ॒भीति॑ । दी॒क्षेत॑ । ताव॑न्तः । अ॒स्य । प॒शवः॑ ।
स्युः॑ । रा॒स्व । इ॒यत् । 31 (50)

TS 6.1.4.8

सो॒माऽऽ* भू॒यो भ॒रेत्या॒हा-प॒रि॒मि॒ता॒ने॒व प॒शून्॒व रु॒न्धे च॒न्द्रम॑सि
मम॑ भो॒गाय॑ भ॒वेत्या॒ह य॒थादे॒वत॑मे॒वैनाः॑ प्र॒ति गृ॑ह्णाति वा॒यवे॑
त्वा व॒रु॒णाय॑ त्वेति॑ य॒दे॒वमे॒ता ना॒नुदि॒शेद॑य॒थादे॒वतं॑ दक्षि॒णा
गम॑ये॒दा दे॒वता॑भ्यो वृ॒श्च्ये॒त य॒दे॒वमे॒ता अ॒नुदि॒शति॑ य॒थादे॒वत॑मे॒व
दक्षि॒णा गम॑यति न दे॒वता॑भ्य आ - [] 32

TS 6.1.4.8 - Padam

सो॒म । ए॒ति । भू॒यः । भ॒र । इ॒ति । आ॒ह ।
अ॒प॒रि॒मि॒ता॒नित्य॑प॒रि-मि॒तान् । ए॒व । प॒शून् । अ॒वेति॑ । रु॒न्धे ।
च॒न्द्रम् । अ॒सि । मम॑ । भो॒गाय॑ । भ॒व । इ॒ति । आ॒ह ।
य॒थादे॒वत॑मि॒ति य॒था - दे॒वत॑म् । ए॒व । ए॒नाः । प्र॒तीति॑ । गृ॑ह्णाति ।
वा॒यवे॑ । त्वा । व॒रु॒णाय॑ । त्वा । इ॒ति । यत् । ए॒वम् । ए॒ताः । न ।
अ॒नुदि॒शेदित्य॑नु - दि॒शेत् । अ॒य॒थादे॒वत॑मित्य॒यथा - दे॒वत॑म् ।

दक्षि॑णाः । ग॒म॒येत् । ए॒ति॑ । दे॒वता॑भ्यः । वृ॒श्च॒येत् । यत् । ए॒वम् ।
 ए॒ताः । अ॒नु॒दि॒शती॑त्यनु – दि॒शति॑ । य॒था॒दे॒वत॑मिति॑ यथा – दे॒वत॑म् ।
 ए॒व । दक्षि॑णाः । ग॒म॒यति॑ । न । दे॒वता॑भ्यः । ए॒ति॑ । 32 (50)

TS 6.1.4.9

वृ॒श्च॒यते॑ दे॒वीरा॑पो अ॒पां न॒पादि॑त्याह॒ यद्वो॑ मे॒द्ध्यं॑ य॒ज्ञिय॑ꣳ
 स॒दे॒वं तद्वो॑ मा॒ऽव क्र॑मिष॒मिति॑ वा॒वैत॑दाहाच्छि॒न्नं तन्तुं॑ पृथि॒व्या
 अ॒नु गे॑ष॒मित्या॑ह॒ सेतु॑मे॒व कृ॒त्वाऽत्ये॑ति ॥ 33

TS 6.1.4.9 - Padam

वृ॒श्च॒यते॑ । दे॒वीः । आ॒पः । अ॒पाम् । न॒पात् । इति॑ । आ॒ह । यत् ।
 वः । मे॒द्ध्यम् । य॒ज्ञियम् । स॒दे॒वमिति॑ स – दे॒वम् । तत् । वः ।
 मा । अ॒वेति॑ । क्र॑मिष॒म् । इति॑ । वा॒व । ए॒तत् । आ॒ह । अ॒च्छि॒न्नम् ।
 तन्तु॑म् । पृथि॒व्याः । अ॒न्विति॑ । गे॒षम् । इति॑ । आ॒ह । सेतु॑म् । ए॒व ।
 कृ॒त्वा । अ॒तीति॑ । ए॒ति॑ ॥ 33 (33)

(भु॒ञ्ज॒ते – ऽयं – छि॑न्दाद् – रु॒न्धे – ऽग्नि॑ – रा॒ह दे॒व – इ॒यद्
 – दे॒वता॑भ्य आ – त्र॒यस्त्रि॑ꣳश्च) (A4)

TS 6.1.5.1

दे॒वा वै दे॒वय॑जन-म॒द्ध्यव॑साय दि॒शो न प्रा॑जानन् ते॑(१)ऽन्यो-
ऽन्यमु॑पाधावन् त्वया प्र जानाम त्वयेति तेऽदि॑त्याꣳ सम॒दि॒ध्रय॑न्त
त्वया प्र जानामेति साऽब्र॑वीद्-वरं वृ॒णै मत्प्रा॑यणा ए॒व वो य॑ज्ञा
मदु॑दयना असन्निति तस्मा॑दादित्यः प्राय॑णीयो य॒ज्ञाना॑मादित्य
उद॑यनीयः पञ्च दे॒वता॑ यजति पञ्च दि॒शो दि॒शां

॥
प्र॒ज्ञात्या – [] 34

TS 6.1.5.1 - Padam

दे॒वाः । वै । दे॒वय॑जनमि॒ति दे॒व – य॑जनम् ।
अ॒द्ध्यव॑सायेत्यधि – अ॒वसा॑य । दि॒शः । न । प्रेति॑ । अ॒जान॑न् ।
ते । अ॒न्यः । अ॒न्यम् । उपेति॑ । अ॒धाव॑न् । त्वया॑ । प्रेति॑ । जा॒नाम ।
त्वया॑ । इति॑ । ते । अ॒दि॒त्याम् । समि॑ति । अ॒दि॒ध्रय॑न्त । त्वया॑ । प्रेति॑ ।
जा॒नाम । इति॑ । सा । अ॒ब्रवी॑त् । वर॑म् । वृ॒णै । मत्प्रा॑यणा इति॑
मत् – प्रा॑यणाः । ए॒व । वः । य॒ज्ञाः । मदु॑दयना इति॑ मत्-उद॑यनाः ।
अ॒सन् । इति॑ । तस्मा॑त् । आ॒दि॒त्यः । प्रा॑यणीय इति॑ प्र-अ॒यनी॑यः ।

य॒ज्ञाना॑म् । आ॒दि॒त्यः । उ॒द॒य॒नी॒य इ॒त्यु॒त् – अ॒य॒नी॒यः । प॒ञ्च ।

दे॒वताः॑ । य॒ज॒ति । प॒ञ्च । दि॒शः । दि॒शाम् ।

प्र॒ज्ञा॒त्या इति॑ प्र – ज्ञा॒त्यै । 34 (50)

TS 6.1.5.2

अथो॑ प॒ञ्चाक्ष॑रा प॒ङ्क्तिः पा॒ङ्क्तो य॒ज्ञो य॒ज्ञमे॒वाव रु॒न्धे प॒थ्या॑
स्व॒स्ति॒म॒य॒जन् प्रा॒चीमे॒व तया॑ दि॒शं प्रा॒जान॑न्न॒ग्निना॑ दक्षि॒णा
सोमे॑न प्र॒तीची॑ स॒वि॒त्रोदी॑ची – म॒दि॒त्योर्ध्वा॑ प॒थ्या॑ स्व॒स्तिं
य॒ज॒ति प्रा॒चीमे॒व तया॑ दि॒शं प्र जा॑नाति प॒थ्या॑

स्व॒स्ति॒मिष्ट्वा॑ग्नी॒षोमौ॑ य॒ज॒ति चक्षु॑षी वा ए॒ते य॒ज्ञस्य॑
यद॒ग्नी॒षोमौ॑ ताभ्यामे॒वानु॑ पश्य – [] 35

TS 6.1.5.2 - Padam

अथो॑ इति॑ । प॒ञ्चाक्ष॑रेति॑ प॒ञ्च – अ॒क्षरा॑ । प॒ङ्क्तिः । पा॒ङ्क्तः । य॒ज्ञः ।
य॒ज्ञम् । ए॒व । अ॒वेति॑ । रु॒न्धे । प॒थ्याम् । स्व॒स्तिम् । अ॒य॒ज॒न् ।
प्रा॒चीम् । ए॒व । तया॑ । दि॒शम् । प्रेति॑ । अ॒जान॑न् । अ॒ग्निना॑ ।
दक्षि॒णा । सोमे॑न । प्र॒तीची॑म् । स॒वि॒त्रा । उदी॑चीम् । अ॒दि॒त्या ।

ऊ॒र्ध्वा॑म् । प॒थ्या॑म् । स्व॒स्ति॑म् । य॒ज॒ति॑ । प्रा॒ची॑म् । ए॒व । तया॑ ।
दि॒श॑म् । प्रे॒ति॑ । जा॒ना॒ति॑ । प॒थ्या॑म् । स्व॒स्ति॑म् । इ॒ष्ट्वा॑ ।
अ॒ग्नी॑षो॒मा॒वि॒त्य॒ग्नी॑-सोमौ॑ । य॒ज॒ति॑ । चक्षु॑षी इति॑ । वै । ए॒ते इति॑ ।
य॒ज्ञ॒स्य॑ । यत् । अ॒ग्नी॑षो॒मा॒वि॒त्य॒ग्नी॑ - सोमौ॑ । ता॒भ्या॑म् । ए॒व ।
अ॒न्वि॒ति॑ । प॒श्य॒ति॑ । 35 (50)

TS 6.1.5.3

-त्य॒ग्नी॑षो॒मा॒वि॒ष्ट्वा॑ स॒वि॒तारं॑ ँय॒ज॒ति॑ स॒वि॒तृ॒प्र॒सू॒त ए॒वानु॑ प॒श्य॒ति॑
स॒वि॒तार॑मि॒ष्ट्वा॑ऽदि॒तिं॑ ँय॒ज॒ती॒यं॑ वा अ॒दि॒ति॒र॒स्यामे॒व प्र॑ति॒ष्ठा॒यानु॑
प॒श्य॒त्य॒दि॒ति॒मि॒ष्ट्वा॑ मा॒रु॒ती॒मृ॒च॒म॒न्वा॒ह म॒रु॒तो वै दे॒वा॒नां॑ वि॒शो
दे॒व॒वि॒शां॑ ख॒लु वै क॒ल्प॒मा॒नं॑ म॒नु॒ष्य॒वि॒श॒म॒नु क॒ल्प॒ते॒ यन्
मा॒रु॒ती॒मृ॒च॒म॒न्वा॒ह वि॒शां॑ क्लृ॒प्त्यै॑ ब्र॒ह्म॒वा॒दि॒नो॑ वद॒न्ति॑
प्र॒या॒ज॒व॒द॒न॒नू॒या॒जं॑ प्रा॒य॒णी॒यं॑ का॒र्य॑-म॒नू॒या॒ज॒व - [] 36

TS 6.1.5.3 - Padam

अ॒ग्नी॑षो॒मा॒वि॒त्य॒ग्नी॑ - सोमौ॑ । इ॒ष्ट्वा॑ । स॒वि॒तार॑म् । य॒ज॒ति॑ ।
स॒वि॒तृ॒प्र॒सू॒त इति॑ स॒वि॒तृ - प्र॒सू॒तः॑ । ए॒व । अ॒न्वि॒ति॑ । प॒श्य॒ति॑ ।

स॒वि॒तार॑म् । इ॒ष्ट्वा । अ॒दि॒तिम् । य॒ज॒ति॒ । इ॒यम् । वै । अ॒दि॒तिः ।
 अ॒स्याम् । ए॒व । प्र॒ति॒ष्ठा॒येति॑ प्र॒ति – स्था॒य॒ । अ॒न्वि॒ति॒ । प॒श्य॒ति॒ ।
 अ॒दि॒तिम् । इ॒ष्ट्वा । मा॒रु॒तीम् । ऋ॒चम् । अ॒न्वि॒ति॒ । आ॒ह॒ । म॒रुतः॑ ।
 वै । दे॒वा॒नाम् । वि॒शः । दे॒व॒वि॒श॒मि॒ति॒ दे॒व – वि॒शम् । ख॒लु॒ । वै ।
 क॒ल्प॒मा॒नम् । म॒नु॒ष्य॒वि॒श॒मि॒ति॒ म॒नु॒ष्य॒-वि॒शम् । अ॒न्वि॒ति॒ । क॒ल्प॒ते॒ ।
 यत् । मा॒रु॒तीम् । ऋ॒चम् । अ॒न्वा॒हे॒त्य॒नु॒-आ॒ह॒ । वि॒शाम् । क॒लृ॒प्त्यै॑ ।
 ब्र॒ह्म॒वा॒दि॒न॒ इति॑ ब्र॒ह्म – वा॒दि॒नः॑ । व॒द॒न्ति॒ । प्र॒या॒ज॒व॒दि॒ति॒
 प्र॒या॒ज – व॒त् । अ॒न॒नू॒या॒ज॒मि॒त्य॒न॒नु॒ – या॒जम् । प्रा॒य॒णी॒य॒मि॒ति॒
 प्र – अ॒य॒णी॒य॒म् । का॒र्य॒म् । अ॒नू॒या॒ज॒व॒दि॒त्य॒नू॒या॒ज – व॒त् । 36 (50)

TS 6.1.5.4

द॒प्र॒या॒ज॒-मु॒द॒य॒नी॒य॒मि॒ती॒मे॒ वै प्र॒या॒जा अ॒मी अ॒नू॒या॒जाः सै॒व सा
 य॒ज्ञ॒स्य॑ स॒न्त॒ति॒स्तत्॒ तथा॑ न का॒र्य॒मा॒त्मा वै प्र॒या॒जाः प्र॒जाऽनू॒या॒जा
 यत् प्र॒या॒जा-न॒न्त॒रि॒या॒दा॒त्मा॒न॒म॒-न्त॒रि॒या॒द्-य॒द॒नू॒या॒जा-न॒न्त॒रि॒या॒त्
 प्र॒जा॒म॒न्त॒रि॒या॒द्य॒तः॑ ख॒लु॒ वै य॒ज्ञ॒स्य॑ वि॒त॒त॒स्य॑ न क्रि॒य॒ते॒ तद॒नु॒
 य॒ज्ञः॑ प॒रा भ॒व॒ति॒ य॒ज्ञं॑ प॒रा॒भ॒व॒न्तं॑ य॒ज॒मा॒नोऽनु॒ – [] 37

TS 6.1.5.4 - Padam

अप्र॒याज॑मित्य॒प्र – या॒जम् । उ॒दय॑नीयमित्यु॒त् – अ॒यनी॑यम् । इति॑ ।
 इ॒मे । वै । प्र॒या॒जा इति॑ प्र – या॒जाः । अ॒मी इति॑ । अ॒नूया॒जा
 इत्य॑नु – या॒जाः । सा । ए॒व । सा । य॒ज्ञस्य॑ । स॒न्तति॑रिति
 सं – त॒तिः । तत् । त॒था । न । का॒र्यम् । आ॒त्मा । वै । प्र॒या॒जा इति॑
 प्र – या॒जाः । प्र॒जेति॑ प्र – जा । अ॒नूया॒जा इत्य॑नु-या॒जाः । यत् ।
 प्र॒या॒जानि॑ति प्र-या॒जान् । अ॒न्तरि॑यादित्य॒न्तः – इ॒यात् । आ॒त्मान॑म् ।
 अ॒न्तः । इ॒यात् । यत् । अ॒नूया॒जानित्य॑नु – या॒जान् ।
 अ॒न्तरि॑यादित्य॒न्तः – इ॒यात् । प्र॒जामि॑ति प्र-जा॒म् । अ॒न्तः । इ॒यात् ।
 यतः॑ । ख॒लु । वै । य॒ज्ञस्य॑ । वि॒त॒तस्ये॑ति वि-त॒तस्य॑ । न । क्रि॒यते॑ ।
 तत् । अ॒न्वि॑ति । य॒ज्ञः । पे॒रेति॑ । भ॒वति॑ । य॒ज्ञम् ।
 पे॒राभ॑वन्तमि॒ति पे॒रा – भ॑वन्तम् । य॒ज॒मा॒नः । अ॒नु । 37 (50)

TS 6.1.5.5

पे॒रा भ॑वति प्र॒या॒जव॑दे॒वा-नू॒या॒जव॑त् प्रा॒यणी॑यं का॒र्यं
 प्र॒या॒जव॑द॒नूया॒जव॑-दु॒दय॑नीयं नाऽऽ*त्मा॒नम॑न्तरेति न प्र॒जां न
 य॒ज्ञः पे॒राभ॑वति न य॒ज॒मा॒नः प्रा॒यणी॑यस्य निष्का॒स उ॒दय॑नीयम॒भि

निर्व॑पति॒ सैव॑ सा॒ य॒ज्ञस्य॑ सन्तति॑र्याः प्राय॑णीयस्य॒ याज्या॑ यत्
ता॒ उदय॑नीयस्य॒ याज्याः॑ कुर्यात्॒ परा॑ङ्मुं॒ लोक॑मा॒ रोहे॑त् प्रमा॒यु॒कः
स्या॒द्याः प्राय॑णीयस्य॒ पुरो॑ऽनुवा॒क्यास्ता॑ () उदय॑नीयस्य॒ याज्याः॑
करो॑त्यस्मिन्ने॒व लो॒के प्र॒ति तिष्ठ॑ति ॥ 38

TS 6.1.5.5 - Padam

परे॑ति । भ॒वति॑ । प्र॒याज॑वदिति॒ प्रया॑ज – वत् । ए॒व ।
अ॒नूया॑जवदित्य॒नूया॑ज – वत् । प्राय॑णीयमिति॒ प्र – अ॒यनी॑यम् ।
का॒र्यम् । प्र॒याज॑वदिति॒ प्रया॑ज – वत् । अ॒नूया॑जवदित्य॒नूया॑ज – वत् ।
उदय॑नीयमित्यु॒त् – अ॒यनी॑यम् । न । आ॒त्मान॑म् । अ॒न्तरे॑तीत्यन्तः – ए॒ति ।
न । प्र॒जामि॑ति॒ प्र – जा॑म् । न । य॒ज्ञः । प॒राभ॑वतीति॒ परा॑ – भ॒वति॑ ।
न । य॒ज॒मा॒नः । प्राय॑णीयस्येति॒ प्र – अ॒यनी॑यस्य । निष्का॑से ।
उदय॑नीयमित्यु॒त् – अ॒यनी॑यम् । अ॒भि । नि॒रिति॑ । व॒पति॑ । सा । ए॒व ।
सा । य॒ज्ञस्य॑ । सन्तति॑रिति॒ सं – त॒तिः । याः ।
प्राय॑णीयस्येति॒ प्र – अ॒यनी॑यस्य । याज्याः॑ । यत् । ताः ।

उ॒द॒य॒नी॒य॒स्ये॒त्यु॒त्-अ॒य॒नी॒य॒स्य॑ । या॒ज्याः॑ । कु॒र्या॒त् । परा॒ङ् । अ॒मु॒म् ।
लो॒क॒म् । ए॒ति॑ । रो॒हे॒त् । प्र॒मा॒यु॒क॒ इति॑ प्र – मा॒यु॒कः॑ । स्या॒त् । याः॑ ।
प्रा॒य॒णी॒य॒स्ये॒ति॑ प्र – अ॒य॒नी॒य॒स्य॑ । पु॒रो॒नु॒वा॒क्या॑ इति॑
पु॒रः – अ॒नु॒वा॒क्याः॑ । ताः () । उ॒द॒य॒नी॒य॒स्ये॒त्यु॒त् – अ॒य॒नी॒य॒स्य॑ ।
या॒ज्याः॑ । क॒रो॒ति॑ । अ॒स्मि॒न् । ए॒व । लो॒के॑ । प्र॒ती॒ति॑ ।
ति॒ष्ठ॒ति॑ ॥ 38 (58) (प्र॒जा॒त्यै॑ – प॒श्य॒त्य॑ – नू॒या॒ज॒व॑ – द्य॒ज॒मा॒नो॒ऽनु॑ –
पु॒रो॒नु॒वा॒क्या॑स्ता – अ॒ष्टौ॑ च) (A5)

TS 6.1.6.1

क॒द्रू॒श्च॒ वै सु॒प॒र्णी॑ चा॒ऽऽ*त्म॒रूप॑यो॒रस्प॑र्ध॒न्ता॒ꣳ सा॒ क॒द्रूः॑
सु॒प॒र्णी॑म॒ज॒य॒थ् सा॒ब्र॑वी॒त् तृ॒ती॒य॒स्या॒मि॒तो दि॒वि सो॒म॒स्त॒मा ह॒र
ते॒ना॒ऽऽ*त्मा॒नं॒ निष्क्री॑णी॒ष्वेती॒यं वै॑ क॒द्रू॒रसौ॑ सु॒प॒र्णी॑ छ॒न्दा॒ꣳसि
सौ॒प॒र्णे॒याः सा॒ब्र॑वी॒दस्मै॑ वै पि॒तरौ॑ पु॒त्रान् बि॒भृ॒त-स्तृ॒ती॒य॒स्या॒मि॒तो
दि॒वि सो॒म॒स्त॒मा ह॒र ते॒ना॒ऽऽ*त्मा॒नं॒ निष्क्री॑णी॒ष्वे – [] 39

TS 6.1.6.1 - Padam

क॒द्रूः । च॒ । वै । सु॒पर्णी॑ति॒ सु – पर्णी॑ । च॒ ।
आ॒त्म॒रूप॑यो॒रित्या॑त्म – रूप॑योः । अ॒स्प॒र्द्धे॑ताम् । सा । क॒द्रूः ।
सु॒पर्णी॑मि॒ति सु॒-पर्णी॑म् । अज॑यत् । सा । अब्र॑वीत् । तृ॒तीय॑स्याम् ।
इ॒तः । दि॒वि । सोमः॑ । तम् । ए॒ति । ह॒र । तेन॑ । आ॒त्मान॑म् ।
नि॒रिति॑ । क्री॒णीष्व॑ । इति॑ । इ॒यम् । वै । क॒द्रूः । अ॒सौ । सु॒पर्णी॑ति॒
सु॒-पर्णी॑ । छ॒न्दा॒सि । सौ॒पर्णे॑याः । सा । अब्र॑वीत् । अ॒स्मै । वै ।
पि॒तरौ॑ । पु॒त्रान् । बि॒भृतः॑ । तृ॒तीय॑स्याम् । इ॒तः । दि॒वि । सोमः॑ ।
तम् । ए॒ति । ह॒र । तेन॑ । आ॒त्मान॑म् । नि॒रिति॑ । क्री॒णीष्व॑ । 39 (50)

TS 6.1.6.2

ति॒ मा क॒द्रू॒रवो॑च॒दिति॑ जग॒त्युद॑प॒त-च्य॑तु॒र्दशा॑क्ष॒रा स॒ती सा ऽप्रा॑प्य
न्य॑व॒र्तत॑ तस्यै॒ द्वे अ॒क्षरे॑ अमी॒येता॑ सा प॒शुभि॑श्च दी॒क्षया॑
चा॒गच्छ॑त् तस्मा॒ज्जग॑ती छ॒न्दसां॑ प॒शव्य॑त॒मा तस्मा॑त् प॒शुम॑न्तं
दी॒क्षोप॑ नम॒ति त्रि॒ष्टुगु॑द॒पत॑त् त्रयो॒दशा॑क्ष॒रा स॒ती सा ऽप्रा॑प्य
न्य॑व॒र्तत॑ तस्यै॒ द्वे अ॒क्षरे॑ अमी॒येता॑ सा दक्षि॑णाभिश्च – [] 40

TS 6.1.6.2 - Padam

इति॑ । मा॒ । क॒द्रूः । अ॒वोच॑त् । इति॑ । जग॑ती । उदि॑ति । अ॒पत॑त् ।
चतु॑र्दशाक्ष॒रेति॑ चतु॑र्दश – अ॒क्षरा॑ । स॒ती । सा ।
अप्रा॑प्येत्यप्र – आ॒प्य । नी॒ति । अ॒वर्त॑त । तस्यै॑ ॥ द्वे इति॑ । अ॒क्षरे॑
इति॑ । अ॒मीये॑ताम् । सा । प॒शुभि॑रिति॑ प॒शु – भिः॑ । च । दी॒क्षया॑ ॥
च । एति॑ । अ॒गच्छ॑त् । तस्मा॑त् । जग॑ती । छन्द॑साम् । प॒शव्य॑तमेति॑
प॒शव्य॑ – तमा॑ । तस्मा॑त् । प॒शुम॑न्तमिति॑ प॒शु – म॑न्तम् । दी॒क्षा ।
उपे॑ति । न॒मति॑ । त्रि॒ष्टुक् । उदि॑ति । अ॒पत॑त् । त्रयो॑दशाक्ष॒रेति॑
त्रयो॑दश – अ॒क्षरा॑ । स॒ती । सा । अप्रा॑प्येत्यप्र – आ॒प्य । नी॒ति ।
अ॒वर्त॑त । तस्यै॑ ॥ द्वे इति॑ । अ॒क्षरे॑ इति॑ । अ॒मीये॑ताम् । सा ।
दक्षि॑णाभिः । च । 40 (50)

TS 6.1.6.3

तप॑सा चा॒गच्छ॑त् तस्मा॑त् त्रि॒ष्टुभो॑ लो॒के मा॒द्ध्य॑न्दिने॒ सव॑ने दक्षि॑णा
नी॒यन्त॑ ए॒तत् ख॒लु वा॒व तप॑ इत्या॒हुर्यः॑ स्वं द॒दाती॑ति
गा॒यत्र्यु॑दप॒तच्च॑तुरक्ष॒रा स॒त्यज॑या ज्योति॑षा तम॑स्या अ॒जाभ्य॑रुन्ध

तदजाया॑ अज॒त्वꣳ सा सोमं॑ चाऽऽहर॑च्च॒त्वारि॑ चाक्ष॒राणि॑ साऽष्टाक्ष॑रा
सम॑पद्यत ब्रह्मवा॒दिनो॑ वदन्ति॒ – [] 41

TS 6.1.6.3 - Padam

तप॑सा । च । एति॑ । अग॒च्छत् । तस्मा॑त् । त्रि॒ष्टुभः॑ । लो॒के ।
माद्ध्य॑न्दिने । सव॑ने । दक्षि॑णाः । नी॒यन्ते॑ । एत॑त् । खलु॑ । वाव ।
तपः॑ । इति॑ । आ॒हुः । यः । स्वम् । ददा॑ति । इति॑ । गा॒यत्री । उदि॑ति ।
अप॑तत् । चतु॑रक्ष॒रेति॑ चतुः – अक्ष॒रा । स॒ती । अज॑या । ज्योति॑षा ।
तम् । अस्यै॑ । अजा॑ । अभी॑ति । अरु॒न्ध । तत् । अजा॑याः ।
अज॒त्वमि॑त्यज-त्वम् । सा । सोम॑म् । च । एति॑ । अहर॑त् । च॒त्वारि॑ ।
च । अक्ष॑राणि । सा । अष्टाक्ष॑रेत्यष्टा – अक्ष॒रा । समि॑ति । अप॑द्यत ।
ब्रह्मवा॒दिन इति॑ ब्रह्म – वा॒दिनः॑ । वद॑न्ति । 41 (50)

TS 6.1.6.4

कस्मा॑त् स॒त्याद्-गा॒यत्री क॑निष्ठा छन्द॑साꣳ स॒ती यज्ञ॑मुखं प॒रीया॑येति
यदे॒वादः॑ सोम॑माऽहर॑त् तस्मा॑द्-यज्ञ॑मुखं प॒र्यैत् तस्मा॑त् तेज॒स्विनी॑तमा
पद्भ्यां॑ द्वे सव॑ने स॒मगृ॑ह्णान् मुखे॑नैकं यन्मुखे॑न स॒मगृ॑ह्णात्

तद॑ध॒यत् तस्मा॑द् द्वे स॒वने शु॒क्र॒वती॑ प्रा॒तस्स॒वनं च॒ मा॒द्ध्य॒न्दि॒नं
च॒ तस्मा॑त् तृतीय॑ स॒वन ऋ॒जी॒षम॒भि षु॑ण्वन्ति धी॒तमि॑व हि
म॒न्यन्त॑ – [] 42

TS 6.1.6.4 - Padam

कस्मा॑त् । स॒त्यात् । गा॒य॒त्री । क॒नि॒ष्ठा । छ॒न्द॒साम् । स॒ती ।
य॒ज्ञमु॒खमि॑ति य॒ज्ञ – मु॒खम् । प॒रीति॑ । इ॒याय॑ । इति॑ । यत् । ए॒व ।
अ॒दः । सोम॑म् । एति॑ । अ॒हरत् । तस्मा॑त् । य॒ज्ञमु॒खमि॑ति
य॒ज्ञ – मु॒खम् । प॒रीति॑ । ऐ॒त् । तस्मा॑त् । ते॒ज॒स्विनी॑तमेति॑
ते॒ज॒स्विनी॑-त॒मा । प॒द्भ्यामि॑ति प॒त्-भ्याम् । द्वे इति॑ । स॒वने इति॑ ।
स॒म॒गृ॒ह्णादि॑ति सं – अ॒गृ॒ह्णात् । मुखे॑न । ए॒कम् । यत् । मुखे॑न ।
स॒म॒गृ॒ह्णादि॑ति सं – अ॒गृ॒ह्णात् । तत् । अ॒ध॒यत् । तस्मा॑त् । द्वे इति॑ ।
स॒वने इति॑ । शु॒क्र॒वती॑ इति॑ शु॒क्र – व॒ती । प्रा॒तस्स॒वनमि॑ति
प्रा॒तः – स॒वनम् । च॒ । मा॒द्ध्य॒न्दि॒नम् । च॒ । तस्मा॑त् ।

तृ॒ती॒य॒स॒व॒न॒ इति॑ तृ॒ती॒य॒ – स॒व॒ने । ऋ॒जी॒ष॒म् । अ॒भी॒ति॑ । सु॒न्व॒न्ति॑ ।
धी॒त॒म् । इ॒व । हि॒ । म॒न्य॒न्ते॑ । 42 (50)

TS 6.1.6.5

आ॒शि॒र॒म॒व॒ न॒य॒ति॑ स॒शु॒क्र॒त्वा॒या॒थो॒ सं॒ भ॒र॒त्ये॒वैन॑त् त॒ꣳ
सो॒म॒-मा॒हि॒य॒मा॒णं॑ ग॒न्ध॒र्वो॒ वि॒श्वा॒व॒सुः॑ प॒र्य॒मु॒ष्णा॒थ् स॒ ति॒स्रो॒ रा॒त्रीः॑
प॒रि॒मु॒षि॒तो॒ऽव॒स॒त् तस्मा॑त् ति॒स्रो॒ रा॒त्रीः॑ क्री॒तः॑ सो॒मो॒ व॒स॒ति॒ ते दे॒वा
अ॒ब्रु॒व॒न्थ् स्त्री॒का॒मा॒ वै ग॒न्ध॒र्वा॒ स्त्रि॒त्र॒या॒ निष्क्री॑णामेति॒ ते वा॒चꣳ
स्त्रि॒य॒मे॒क॒हा॒य॒नीं॑ कृ॒त्वा॒ तया॑ नि॒र॒क्री॑णन्थ् सा॒ रो॒हि॒द्-रू॒पं॑ कृ॒त्वा
ग॒न्ध॒र्वे॒भ्यो॑- [] 43

TS 6.1.6.5 - Padam

आ॒शि॒र॒म् । अ॒वे॒ति॑ । न॒य॒ति॑ । स॒शु॒क्र॒त्वा॒ये॒ति॑ स॒शु॒क्र॒ – त्वा॒य॑ ।
अ॒थो॒ इति॑ । स॒मि॒ति॑ । भ॒र॒ति॑ । ए॒व । ए॒न॒त् । त॒म् । सो॒म॒म् ।
आ॒हि॒य॒मा॒ण॒मि॒त्या॑ – हि॒य॒मा॒ण॒म् । ग॒न्ध॒र्वः॑ ।
वि॒श्वा॒व॒सु॒रि॒ति॑ वि॒श्व॒ – व॒सुः॑ । प॒री॒ति॑ । अ॒मु॒ष्णा॒त् । सः॑ । ति॒स्रः॑ ।
रा॒त्रीः॑ । प॒रि॒मु॒षि॒त॒ इति॑ प॒रि॒ – मु॒षि॒तः॑ । अ॒व॒स॒त् । तस्मा॑त् । ति॒स्रः॑ ।

रात्रीः॑ । क्री॒तः । सोमः॑ । व॒स॒ति॑ । ते । दे॒वाः । अ॒ब्रु॒वन् । स्त्री॑का॒मा
इति॑ स्त्री – का॒माः । वै । गन्ध॑र्वाः । स्त्रि॒या । नि॒रिति॑ । क्री॒णाम् ।
इति॑ । ते । वाच॑म् । स्त्रि॒यम् । ए॒कहा॑यनी॒मित्ये॒क – हा॒यनी॑म् ।
कृ॒त्वा । तया॑ । नि॒रिति॑ । अ॒क्री॒णन् । सा । रो॒हि॒त् । रू॒पम् । कृ॒त्वा ।
गन्ध॑र्वेभ्यः । 43 (50)

TS 6.1.6.6

ऽप॒क्र॒म्याति॑ष्ठत् तद्-रो॒हि॒तो जन्म॑ ते दे॒वा अ॒ब्रु॒वन्प॑ यु॒ष्मद॑क्र॒मी-
न्नास्मा॑नु-पाव॑र्तते वि ह॒याम॑हा इति॑ ब्र॒ह्म गन्ध॑र्वा अव॑दन्नगा॒यन् दे॒वाः
सा दे॒वान् गा॑यत उपाव॑र्तत तस्मा॑द्-गा॒यन्त॑ स्त्रि॒यः का॒मय॑न्ते
का॒मु॒का ए॒न॑ स्त्रि॒यो भ॑वन्ति य ए॒वं वे॑दाथो य ए॒वं वि॒द्वानपि॑
ज॒न्येषु॑ भ॒वति॑ तेभ्य॑ ए॒व द॑दत्यु॒त यद्-ब॒हु॒तया॑ – [] 44

TS 6.1.6.6 - Padam

अ॒प॒क्र॒म्येत्य॑प – क्र॒म्य । अ॒ति॒ष्ठत् । तत् । रो॒हि॒तः । जन्म॑ । ते ।
दे॒वाः । अ॒ब्रु॒वन् । अ॒पेति॑ । यु॒ष्मत् । अ॒क्र॒मीत् । न । अ॒स्मान् ।
उपाव॑र्तत इत्यु॒प – आ॒व॑र्तते । वी॒ति । ह॒याम॑है । इति॑ । ब्र॒ह्म ।

गन्ध॒र्वाः । अव॑दन् । अगा॑यन् । दे॒वाः । सा । दे॒वान् । गा॒यतः ।
उपा॑वर्ततेत्युप-आव॑र्तत । तस्मा॑त् । गा॒यन्तम् । स्त्रि॑यः । का॒मय॑न्ते ।
का॒मु॒काः । ए॒नम् । स्त्रि॑यः । भव॑न्ति । यः । ए॒वम् । वेद॑ । अथो॒ इति॑ ।
यः । ए॒वम् । वि॒द्वान् । अपी॑ति । ज॒न्येषु॑ । भव॑ति । तेभ्यः॑ । ए॒व ।
द॒दति॑ । उ॒त । यत् । ब॒हु॒तया॑ इति॑ ब॒हु – तयाः॑ । 44 (50)

TS 6.1.6.7

भव॑न्त्येकहा॒यन्या॑ क्रीणाति॑ वा॒चै॒वैन॑ꣳ स॒र्वया॑ क्रीणाति॑ तस्मा॑देकहा॒यना॑
मनु॑ष्या वा॒चं व॑दन्त्यकू॒टया॑ ऽकर्ण॑याऽका॒णया॑ऽश्लो॒णया॑ ऽस॒प्तश॑फया
क्रीणाति॑ स॒र्वयै॒वैनं॑ क्रीणाति॑ यच्छ्वे॒तया॑ क्रीणीयाद्-दु॒श्च॒र्मा यज॑मानः
स्या॒द्यत् कृ॑ष्णया-ऽनु॒स्तर॑णी स्यात् प्र॒मायु॑को यज॑मानः स्या॒द्यद्
द्वि॒रूप॑या वा॒त्रघ्नी॑ स्या॒थ् स वा॒ऽन्यं जि॑नीयात् तं वा॒ऽन्यो
जिनी॑याद॒रुण॑या पि॒ङ्गाक्ष्या॑ () क्रीणा॑त्येत॒द्वै सोम॑स्य रू॒पꣳ स्वयै॒वैनं॑
दे॒वत॑या क्रीणाति॑ ॥ 45

TS 6.1.6.7 - Padam

भवन्ति । एकहायन्येत्येक – हायन्या । क्रीणाति । वाचा । एव ।
एनम् । सर्वया । क्रीणाति । तस्मात् । एकहायना इत्येक-हायनाः ।
मनुष्याः । वाचम् । वदन्ति । अकूटया । अकर्णया । अकाणया ।
अश्लोणया । असप्तशफयेत्यसप्त – शफया । क्रीणाति । सर्वया ।
एव । एनम् । क्रीणाति । यत् । श्वेतया । क्रीणीयात् ।
दुश्चर्मैति दुः – चर्मा । यजमानः । स्यात् । यत् । कृष्णया ।
अनुस्तरणीत्यनु – स्तरणी । स्यात् । प्रमायुक इति प्र – मायुकः ।
यजमानः । स्यात् । यत् । द्विरूपयेति द्वि – रूपया । वात्रघ्नीति
वात्र – घ्नी । स्यात् । सः । वा । अन्यम् । जिनीयात् । तम् । वा ।
अन्यः । जिनीयात् । अरुणया । पिङ्गाक्ष्येति पिङ्ग – अक्ष्या () ।
क्रीणाति । एतत् । वै । सोमस्य । रूपम् । स्वया । एव । एनम् ।
देवतया । क्रीणाति ॥ 45 (60) (निष्क्रीणीष्व – दक्षिणाभिश्च –
वदन्ति – मन्यन्ते-गन्धर्वेभ्यो-बहुतयाः-पिङ्गाक्ष्या-दश च) (A6)

TS 6.1.7.1

तद्वि॒रण्य॑म॒भवत् तस्मा॑द॒द्भ्यो॑ हि॒रण्यं पु॑नन्ति ब्र॒ह्मवा॑दि॒नो वद॑न्ति
कस्मा॑त् स॒त्याद॑न॒स्थिके॑न प्र॒जाः प्र॒वीय॑न्ते ऽस्थ॒न्वती॑र्जायन्त इति
यद्वि॒रण्यं घृ॑ते॒ऽव॒धाय॑ जु॒होति॑ तस्मा॑द॒न॒स्थिके॑न प्र॒जाः प्र॒ वी॑यन्ते
ऽस्थ॒न्वती॑र्जायन्त ए॒तद्वा अ॒ग्नेः प्रि॒यं धाम॑ यद्-घृ॒तं तेजो॑
हि॒रण्यमि॑यन्ते शु॒क्र त॒नूरि॑दं व॒र्च इत्या॑ह स॒तेज॑समे॒वैन॑
सत॑नुं – [] 46

TS 6.1.7.1 - Padam

तत् । हि॒रण्यम् । अ॒भवत् । तस्मा॑त् । अ॒द्भ्य इत्य॑त् – भ्यः ।
हि॒रण्यम् । पु॑नन्ति । ब्र॒ह्मवा॑दि॒न इति॑ ब्र॒ह्म – वा॒दिनः॑ । वद॑न्ति ।
कस्मा॑त् । स॒त्यात् । अ॒न॒स्थिके॑न । प्र॒जा इति॑ प्र – जाः ।
प्र॒वीय॑न्त इति॑ प्र – वी॑यन्ते । अ॒स्थ॒न्वती॑रित्य॒स्थन् – वतीः॑ ।
जा॒यन्ते॑ । इति॑ । यत् । हि॒रण्यम् । घृ॑ते । अ॒व॒धाये॑त्य॒व – धाय॑ ।
जु॒होति॑ । तस्मा॑त् । अ॒न॒स्थिके॑न । प्र॒जा इति॑ प्र – जाः । प्रेति॑ ।
वी॒यन्ते॑ । अ॒स्थ॒न्वती॑रित्य॒स्थन् – वतीः॑ । जा॒यन्ते॑ । ए॒तत् । वै ।

अ॒ग्नेः । प्रि॒यम् । धाम॑ । यत् । घृ॒तम् । तेजः॑ । हि॒रण्यम् । इ॒यम् ।
ते । शु॒क्र । त॒नूः । इ॒दम् । वर्चः॑ । इति॑ । आ॒ह । स॒तेज॑स॒मिति॑
स – तेज॑सम् । ए॒व । ए॒नम् । स॒तनु॑मिति॑ स – त॒नुम् । 46 (50)

TS 6.1.7.2

क॒रोत्य॑थो सं भ॒रत्ये॑वैनं॑ य॒दब॑द्धम॒वद॑द्ध्य॒द्-ग॒र्भाः प्र॒जानां॑
प॒रापा॑तु॒काः स्यु॑र्बद्धम॒व द॑धाति॒ गर्भा॑णां धृ॒त्यै नि॒ष्टर्क्यं॑ ब॒द्धना॑ति
प्र॒जानां॑ प्र॒जन॑नाय॒ वाग्वा॑ ए॒षा यथ् सोम॑क्रयणी॒ जूर॑सीत्याह
यद्धि॑ म॒नसा॑ ज॒वते॑ तद्-वा॒चा व॑दति॒ धृता॑ म॒नसे॑त्याह॒ म॒नसा॑ हि
वाग्धृ॑ता जु॒ष्टा वि॒ष्णव॑ इत्याह – [] 47

TS 6.1.7.2 - Padam

क॒रोति॑ । अथो॑ इति॑ । स॒मिति॑ । भ॒रति॑ । ए॒व । ए॒नम् । यत् ।
अ॒बद्ध॑म् । अ॒वद॑द्ध्य॒दित्य॑व – द॒द्ध्य॒त् । ग॒र्भाः ।
प्र॒जाना॑मिति॑ प्र – जाना॑म् । प॒रापा॑तु॒का इति॑ प॒रा-पा॑तु॒काः । स्युः॑ ।
ब॒द्धम् । अ॒वेति॑ । द॒धाति॑ । ग॒र्भाणा॑म् । धृ॒त्यै । नि॒ष्टर्क्य॑म् ।
ब॒द्धना॑ति । प्र॒जाना॑मिति॑ प्र – जाना॑म् । प्र॒जन॑नायेति॑ प्र-ज॒नना॑य ।

वाक् । वै । ए॒षा । यत् । सो॒म॒क्र॒य॒णी॒ति॒ सोम – क्र॒य॒णी । जूः ।
 अ॒सि॒ । इति॑ । आ॒ह॒ । यत् । हि । मन॑सा । ज॒व॒ते । तत् । वा॒चा ।
 व॒द॒ति॒ । धृ॒ता । मन॑सा । इति॑ । आ॒ह॒ । मन॑सा । हि । वाक् । धृ॒ता ।
 जु॒ष्टा॑ । वि॒ष्ण॒वे । इति॑ । आ॒ह॒ । 47 (50)

TS 6.1.7.3

य॒ज्ञो वै वि॒ष्णु॑ र्य॒ज्ञायै॒वैनां॑ जु॒ष्टां॑ करोति॑ तस्या॑स्ते स॒त्य॒स॒व॒सः॑
 प्र॒स॒व इत्या॑ह स॒वि॒तृ-प्र॒सू॒तामे॒व वा॒च॒म॒व रु॒न्धे॒ काण्डे॑काण्डे॑ वै
 क्रि॒य॒मा॒णे य॒ज्ञ॑ र॒क्षा॑सि जिघा॑स्सन्त्येष॒ खलु॑ वा अ॒र॒क्षो॑ह॒तः॑
 पन्था॑ यो॒ऽग्ने॒श्च सूर्य॑स्य च सूर्य॑स्य चक्षु॒रा-ऽरु॑हम॒ग्नेर॒क्षः॑
 क॒नी॒नि॒का॒मि॒त्या॒ह य ए॒वा॒र॒क्षो॑ह॒तः॑ पन्था॑स्त॒ऽस॒मा॒रो॒ह॒ति॒ – [] 48

TS 6.1.7.3 - Padam

य॒ज्ञः । वै । वि॒ष्णुः॑ । य॒ज्ञाय॑ । ए॒व । ए॒ना॒म् । जु॒ष्टा॑म् । करो॒ति॒ ।
 तस्याः॑ । ते । स॒त्य॒स॒व॒स इति॑ स॒त्य – स॒व॒सः॑ । प्र॒स॒व इति॑
 प्र – स॒वे । इति॑ । आ॒ह॒ । स॒वि॒तृप्र॒सू॒तामि॒ति॒ स॒वि॒तृ – प्र॒सू॒ता॒म् ।
 ए॒व । वा॒च॒म् । अ॒वे॒ति॒ । रु॒न्धे॒ । काण्डे॑काण्डे॑ इति॑ काण्डे॑-काण्डे॑ ।

वै । क्रियमाणे । यज्ञम् । रक्षा॑सि । जिघा॑सन्ति । एषः । खलु ।
वै । अरक्षो॑हत इत्यरक्षः – हतः । पन्थाः । यः । अग्नेः । च ।
सूर्य॑स्य । च । सूर्य॑स्य । चक्षुः । एति । अरुह॑म् । अग्नेः । अक्ष्णः ।
कनी॑निकाम् । इति । आह । यः । एव । अरक्षो॑हत इत्यरक्षः – हतः ।
पन्थाः । तम् । समारो॑हतीति सं – आरो॑हति । 48 (50)

TS 6.1.7.4

वाग्वा एषा यत् सोम॑क्रयणी चिद॑सि मना॑सीत्याह शास्त्ये॑वैनामे॒तत्
तस्मा॑च्छिष्टाः प्रजा जाय॑न्ते चिद॑सीत्याह यद्धि मन॑सा चेत॑यते
तद्-वा॒चा वद॑ति मना॑सीत्याह यद्धि मन॑साऽभिगच्छ॑ति तत् करो॑ति
धीर॑सीत्याह यद्धि मन॑सा ध्याय॑ति तद्-वा॒चा – [] 49

TS 6.1.7.4 - Padam

वाक् । वै । एषा । यत् । सोम॑क्रयणीति सोम – क्रय॑णी । चित् ।
अ॒सि । म॒ना । अ॒सि । इति । आह । शास्ति॑ । एव । एना॑म् ।
एतत् । तस्मा॑त् । शिष्टाः । प्रजा इति प्र – जाः । जाय॑न्ते । चित् ।
अ॒सि । इति । आह । यत् । हि । मन॑सा । चेत॑यते । तत् । वा॒चा ।

वदति । म॒ना । अ॒सि॒ । इति॑ । आ॒ह॒ । यत् । हि । म॒न॒सा ।

अ॒भि॒गच्छ॑तीत्य॒भि॒ – गच्छ॑ति । तत् । क॒रोति॑ । धीः । अ॒सि॒ । इति॑ ।

आ॒ह॒ । यत् । हि । म॒न॒सा । ध्या॑यति । तत् । वा॒चा । 49 (50)

TS 6.1.7.5

वदति॑ दक्षि॒णाऽसी॑त्याह दक्षि॒णा ह्येषा॑ य॒ज्ञियाऽसी॑त्याह य॒ज्ञिया॑मेवैनां॑

करोति॑ क्ष॒त्रिया॑सीत्याह क्ष॒त्रिया ह्येषा॑ ऽदिति॑रस्यु॒भयत॑श्शी॒र्ष्णीत्या॑ह

यदे॒वाऽऽदि॑त्यः प्रा॒यणी॑यो य॒ज्ञाना॑मादित्य उद॒यनी॑य – स्तस्मा॑दे॒वमा॑ह

यद॒बद्धा॑ स्याद॒यता॑ स्याद्यत् प॒दिब॑द्धा – ऽनु॒स्तर॑णी स्यात् प्र॒मायु॑को

यज॑मानः स्या – [] 50

TS 6.1.7.5 - Padam

वदति॑ । दक्षि॒णा । अ॒सि॒ । इति॑ । आ॒ह॒ । दक्षि॒णा । हि । ए॒षा ।

य॒ज्ञिया॑ । अ॒सि॒ । इति॑ । आ॒ह॒ । य॒ज्ञिया॑म् । ए॒व । ए॒नाम् । क॒रोति॑ ।

क्ष॒त्रिया॑ । अ॒सि॒ । इति॑ । आ॒ह॒ । क्ष॒त्रिया॑ । हि । ए॒षा । अ॒दि॒तिः ।

अ॒सि॒ । उ॒भयत॑श्शी॒र्ष्णीत्यु॒भयतः॑ – शी॒र्ष्णी॑ । इति॑ । आ॒ह॒ । यत् ।

ए॒व । आ॒दि॒त्यः । प्रा॒यणी॑य इति॑ प्र – अ॒यणी॑यः । य॒ज्ञाना॑म् ।

आ॒दि॒त्यः । उ॒द॒य॒नी॒य इ॒त्यु॒त् – अ॒य॒नी॒यः । तस्मा॑त् । ए॒वम् । आ॒ह ।
यत् । अ॒ब॒द्धा । स्या॑त् । अ॒य॒ता । स्या॑त् । यत् । प॒दि॒ब॒द्धेति॑
प॒दि – ब॒द्धा । अ॒नु॒स्तर॑णीत्यनु – स्त॒र॒णी । स्या॑त् ।
प्र॒मा॒यु॒क इति॑ प्र – मा॒यु॒कः । य॒ज॒मा॒नः । स्या॑त् । 50 (50)

TS 6.1.7.6

– द्यत् क॑र्ण॒गृ॒ही॒ता वा॒र्त्र॒घ्नी॒ स्या॑त् स वा॒ऽन्यं जि॒नी॒यात् तं वा॒ऽन्यो
जि॒नी॒या॒न्मि॒त्रस्त्वा॑ प॒दि ब॑द्ध्ना॒त्वित्या॑ह मि॒त्रो वै शि॒वो दे॒वानां॑
तेनै॒वैनां॑ प॒दि ब॑द्ध्नाति पू॒षाऽध्व॑नः पा॒त्वित्या॑हेयं वै पू॒षेमा॑मे॒वास्या॑
अधि॑पा॒म॒कः स॒म॒ष्ट्या इन्द्रा॑या–द्व्य॒क्षाये॑त्याहेन्द्र॒मेवास्या॑ अ॒द्व्यक्षं॑
करो – [] 51

TS 6.1.7.6 - Padam

यत् । क॑र्ण॒गृ॒ही॒तेति॑ क॑र्ण–गृ॒ही॒ता । वा॒र्त्र॒घ्नीति॑ वा॒र्त्र – घ्नी । स्या॑त् ।
सः । वा । अ॒न्यम् । जि॒नी॒यात् । तम् । वा । अ॒न्यः । जि॒नी॒यात् ।
मि॒त्रः । त्वा । प॒दि । ब॑द्ध्ना॒तु । इति॑ । आ॒ह । मि॒त्रः । वै । शि॒वः ।
दे॒वाना॑म् । तेन॑ । ए॒व । ए॒नाम् । प॒दि । ब॑द्ध्नाति । पू॒षा । अ॒ध्व॒नः ।

पा॒तु । इति॑ । आ॒ह । इ॒यम् । वै । पू॒षा । इ॒माम् । ए॒व । अ॒स्याः ।
अधि॑पा॒मित्यधि॑ – पा॒म् । अ॒कः । स॒म॒ष्ट्या इति॑ सं – अ॒ष्ट्यै ।
इन्द्रा॑य । अ॒द्ध्यक्षा॑येत्यधि॑ – अ॒क्षा॒य । इति॑ । आ॒ह । इन्द्र॑म् । ए॒व ।
अ॒स्याः । अ॒द्ध्यक्ष॑मित्यधि॑ – अ॒क्षम् । क॒रोति॑ । 51 (50)

TS 6.1.7.7

–त्यनु॑ त्वा मा॒ता म॒न्यता॑मनु॑ पि॒तेत्या॑हा–नु॑म॒तयै॑वैनया॑ क्रीणाति॑
सा दे॒वि दे॒वम॑च्छेहीत्या॑ह दे॒वी ह्यैषा॑ दे॒वः सोम॑ इन्द्रा॑य
सोम॑मित्याहेन्द्रा॑य हि सोम॑ आ॒ह्रिय॑ते यदे॒तद्–यजु॑र्न ब्रूयात् परा॑च्येव
सोम॑क्रयणीयाद्–रु॒द्रस्त्वाऽऽ वर्त॑यत्वित्या॑ह रु॒द्रो वै क्रू॒रो – [] 52

TS 6.1.7.7 - Padam

अ॒न्विति॑ । त्वा । मा॒ता । म॒न्यता॑म् । अ॒न्विति॑ । पि॒ता । इति॑ । आ॒ह ।
अनु॑म॒तये॑त्यनु॑ – म॒तया॑ । ए॒व । ए॒नया॑ । क्री॒णाति॑ । सा । दे॒वि ।
दे॒वम् । अ॒च्छ । इ॒हि । इति॑ । आ॒ह । दे॒वी । हि । ए॒षा । दे॒वः ।
सोमः॑ । इन्द्रा॑य । सोम॑म् । इति॑ । आ॒ह । इन्द्रा॑य । हि । सोमः॑ ।
आ॒ह्रिय॑त इत्या॑ – ह्रि॒यते॑ । यत् । ए॒तत् । यजुः॑ । न । ब्रू॒यात् ।

परा॑ची । ए॒व । सो॒म॒क्र॒य॒णी॒ति॒ सोम॑ – क्र॒य॒णी । इ॒या॒त् । रु॒द्रः ।
त्वा । ए॒ति॒ । वर्त॑यतु । इति॑ । आ॒ह । रु॒द्रः । वै । क्रू॒रः । 52 (50)

TS 6.1.7.8

दे॒वा॒नां॑ तमे॒वा॒स्यै॑ पर॒स्ताद्-द॒धा॒त्या॒वृ॒त्त्यै॑ क्रू॒रमि॒व वा ए॒तत् करो॑ति
यद्-रु॒द्रस्य॑ की॒र्तय॑ति मि॒त्रस्य॑ प॒थेत्या॑ह शान्त्यै॑ वा॒चा वा ए॒ष वि
क्री॑णीते यः सो॒म॒क्र॒य॒ण्या स्व॒स्ति सोम॑स॒खा पुन॑रेहि स॒ह र॒य्येत्या॑ह
वा॒चैव॑ वि॒क्री॒य पुन॑रा॒त्मन् वाचं॑ ध॒त्तेऽनु॑प॒दासु॑काऽस्य॒ वाग्भ॑वति
य ए॒वं वैद॑ () ॥ 53

TS 6.1.7.8 - Padam

दे॒वा॒ना॒म् । तम् । ए॒व । अ॒स्यै॑ । पर॒स्ता॒त् । द॒धा॒ति॒ । आ॒वृ॒त्या
इ॒त्या – वृ॒त्त्यै॑ । क्रू॒रम् । इ॒व । वै । ए॒तत् । करो॑ति । यत् । रु॒द्रस्य॑ ।
की॒र्तय॑ति । मि॒त्रस्य॑ । प॒था । इति॑ । आ॒ह । शान्त्यै॑ । वा॒चा । वै ।
ए॒षः । वी॑ति । क्री॒णी॒ते । यः । सो॒म॒क्र॒य॒ण्येति॑ सोम॑ – क्र॒य॒ण्या ।
स्व॒स्ति । सोम॑स॒खेति॑ सोम॑ – स॒खा । पुनः॑ । ए॒ति॒ । इ॒हि । स॒ह ।
र॒य्या । इति॑ । आ॒ह । वा॒चा । ए॒व । वि॒क्री॒येति॑ वि – क्री॒य । पुनः॑ ।

आ॒त्मन् । वा॒चम् । ध॒त्ते । अनु॑पदा॒सुके॒त्यनु॑प – दा॒सुका॒ । अ॒स्य ।

वाक् । भ॒वति॑ । यः । ए॒वम् । वेद॑ () ॥ 53 (50)

(स॒त॒नुं – वि॒ष्ण॒व इ॒त्याह॑ – स॒मा॒रो॒हति॑ – ध्या॒यति॑ तद् वा॒चा –
यज॑मानः स्यात् – करो॑ति – कू॒रो – वेद॑) (A7)

TS 6.1.8.1

षट् प॒दान्यनु॑ नि क्रा॒मति॑ षड॒हं वा॒ङ्नाति॑ वद॒त्युत॑ सँव॒त्स॒रस्या॑यने
याव॑त्ये॒व वा॒क्ताम॑व रुन्धे सप्त॒मे प॒दे जु॑होति सप्त॒पदा॑ शक्वरी
प॒शवः॑ शक्वरी प॒शूने॒वाव॑ रुन्धे सप्त॒ ग्राम्याः॑ प॒शवः॑ सप्ता*ऽऽ॒रण्याः॑
सप्त॒ छन्दा॑-स्यु॒भय॑स्या-वरु॒द्ध्यै व॑स्व्यसि रु॒द्राऽसी॑त्याह
रूप॑मे॒वास्या॑ ए॒तन् म॑हि॒मानं॑ – [] 54

TS 6.1.8.1 - Padam

षट् । प॒दानि॑ । अनु॑ । नी॒ति । क्रा॒मति॑ । षड॒हमि॑ति षट् – अ॒हम् ।
वाक् । न । अ॒तीति॑ । व॒दति॑ । उ॒त । सँव॒त्स॒रस्ये॑ति सं-व॒त्स॒रस्य॑ ।
अ॒यने॑ । याव॑ती । ए॒व । वाक् । ता॒म् । अ॒वेति॑ । रुन्धे॑ । सप्त॒मे ।
प॒दे । जु॑होति । सप्त॒पदे॑ति सप्त – प॒दा । शक्वरी॑ । प॒शवः॑ ।

शक्वरी । प॒शून् । ए॒व । अ॒वेति॑ । रु॒न्धे । स॒प्त । ग्रा॒म्याः । प॒शवः॑ ।
 स॒प्त । आ॒र॒ण्याः । स॒प्त । छ॒न्दा॒सि॑ । उ॒भय॑स्य । अ॒वरु॑द्ध्य
 इ॒त्यव॑ – रु॒द्ध्यै॑ । व॒स्वी॑ । अ॒सि॑ । रु॒द्रा । अ॒सि॑ । इति॑ । आ॒ह ।
 रू॒पम् । ए॒व । अ॒स्याः । ए॒तत् । म॒हि॒मान॑म् । 54 (50)

TS 6.1.8.2

व्या॒च॒ष्टे बृ॒ह॒स्पति॑स्त्वा सु॒म्ने र॒ण्व॒त्वि॒त्याह॑ ब्र॒ह्म॒ वै दे॒वानां॑
 बृ॒ह॒स्पति॑-ब्र॒ह्म॒णैवा॒स्मै प॒शून्व॑ रु॒न्धे रु॒द्रो व॒सुभि॑रा
 चि॒के॒त्वि॒त्याहा॑ऽऽ*वृ॒त्यै पृ॒थि॒व्यास्त्वा॑ मू॒र्ध॒न्ना जि॒घर्मि॑ दे॒वय॑जन
 इ॒त्याह॑ पृ॒थि॒व्या ह्ये॒ष मू॒र्धा यद्-दे॒वय॑जनमि॒डायाः॑ प॒द इ॒त्याहे॒डायै॑
 ह्ये॒तत् प॒दं य॑थ् सोम॒क्रय॑ण्यै घृ॒तव॑ति स्वा॒हे – [] 55

TS 6.1.8.2 - Padam

व्या॒च॒ष्ट इति॑ वि-आ॒च॒ष्टे । बृ॒ह॒स्पतिः॑ । त्वा । सु॒म्ने । र॒ण्व॒तु । इति॑ ।
 आ॒ह । ब्र॒ह्म॒ । वै । दे॒वाना॑म् । बृ॒ह॒स्पतिः॑ । ब्र॒ह्म॒णा । ए॒व । अ॒स्मै ।
 प॒शून् । अ॒वेति॑ । रु॒न्धे । रु॒द्रः । व॒सुभि॑रिति॒ वसु॑ – भिः । एति॑ ।
 चि॒के॒तु । इति॑ । आ॒ह । आ॒वृ॒त्या इ॒त्या – वृ॒त्यै । पृ॒थि॒व्याः । त्वा ।

मू॒र्ध॒न् । ए॒ति । जि॒घ॒र्मि॒ । दे॒व॒य॒ज॒न॒ इति॑ दे॒व-य॒ज॒ने । इति॑ ।
आ॒ह । पृ॒थि॒व्याः । हि । ए॒षः । मू॒र्धा॒ । यत् ।
दे॒व॒य॒ज॒न॒मि॒ति॑ दे॒व – य॒ज॒न॒म् । इ॒डा॒याः । प॒दे । इति॑ । आ॒ह ।
इ॒डा॒यै । हि । ए॒तत् । प॒द॒म् । यत् । सो॒म॒क्र॒य॒ण॒या इति॑
सो॒म – क्र॒य॒ण॒यै । घृ॒त॒व॒तीति॑ घृ॒त-व॒ति॒ । स्वा॒हा ॥ 55 (50)

TS 6.1.8.3

–त्या॒ह॒ य॒दे॒वा॒स्यै॑ प॒दा॒द्-घृ॒त॒म॒पी॒ड्य॑त॒ तस्मा॑दे॒व॒मा॒ह॒
य॒द॒ध्व॒र्यु॒र॒न॒ग्ना॒वा॒हु॒तिं॑ जु॒हु॒या॒द॒न्धो॑ऽध्व॒र्युः॑ स्या॒द्-र॒क्षा॑ँ॒सि
य॒ज्ञ॑ँ॒ ह॒न्यु॒र्.हि॒र॒ण्य॒मु॒पा॒स्य॑ जु॒हो॒त्य॒ग्नि॒व॒त्ये॒व जु॒हो॒ति॒ नान्धो॑ऽध्व॒र्युः॑
भ॒व॒ति॒ न य॒ज्ञ॑ँ॒ र॒क्षा॑ँ॒सि घ्न॑न्ति॒ का॒ण्डे॑का॒ण्डे॑ वै क्रि॒य॒मा॒णे य॒ज्ञ॑ँ॒
र॒क्षा॑ँ॒सि जि॒घा॑ँ॒सन्ति॒ परि॑लि॒खित॑ँ॒ रक्षः॑ परि॒लि॒खिता॑ अ॒रा॒त॒य॒
इ॒त्या॒ह॒ रक्ष॑सा॒म॒प॒ह॒त्या – [] 56

TS 6.1.8.3 - Padam

इति॑ । आ॒ह । यत् । ए॒व । अ॒स्यै॑ । प॒दा॒त् । घृ॒त॒म् । अ॒पी॒ड्य॑त ।
तस्मा॑त् । ए॒व॒म् । आ॒ह । यत् । अ॒ध्व॒र्युः॑ । अ॒न॒ग्नौ॑ ।

आहु॑तिमि॒त्या – हु॒तिम् । जुहु॑यात् । अ॒न्धः । अ॒ध्व॒र्युः । स्या॒त् ।
रक्षा॑ञ्सि । य॒ज्ञम् । ह॒न्युः । हि॒रण्यम् । उ॒पा॒स्ये॒त्युप – अ॒स्य ।
जुहो॑ति । अ॒ग्नि॒वती॑त्यग्नि – व॒ति । ए॒व । जुहो॑ति । न । अ॒न्धः ।
अ॒ध्व॒र्युः । भ॒वति॑ । न । य॒ज्ञम् । रक्षा॑ञ्सि । घ्न॒न्ति । काण्डे॑काण्ड
इति॑ काण्डे॑ – काण्डे॑ । वै । क्रि॒यमा॑णे । य॒ज्ञम् । रक्षा॑ञ्सि ।
जिघा॑ञ्सन्ति । परि॑लिखि॒तमि॒ति परि – लि॒खि॒तम् । रक्षः॑ ।
परि॑लिखि॒ता इति॑ परि – लि॒खि॒ताः । अ॒रा॒तयः॑ । इति॑ । आ॒ह ।
रक्ष॑साम् । अ॒प॒ह॒त्या इत्य॑प – ह॒त्यै । 56 (50)

TS 6.1.8.4

इ॒दम॒हञ् रक्ष॑सो ग्री॒वा अ॒पि कृ॑न्तामि यो॑ऽस्मान् द्वेष्टि॒ यं च॑ व॒यं
द्विष्म॑ इत्या॒ह द्वौ वा॒व पु॒रुषौ॑ यं चै॒व द्वेष्टि॒ यश्चै॒नं द्वेष्टि॒
तयो॑रे॒वान॑न्तरा॒यं ग्री॒वाः कृ॑न्तति प॒शवो॑ वै सो॒मक्र॑यण्यै प॒दं
या॑व॒त्तूतञ् सं॑ व॒पति॒ प॒शूने॒वाव रु॒न्धेऽस्मे॑ रा॒य इति॑ सं
व॒प॒त्या॒त्मान॑-मे॒वाध्व॑र्युः – [] 57

TS 6.1.8.4 - Padam

इ॒दम् । अ॒हम् । र॒क्ष॒सः । ग्री॒वाः । अ॒पी॒ति॑ । कृ॒न्ता॒मि॒ । यः ।
अ॒स्मा॒न् । द्वेष्टि॑ । यम् । च॒ । व॒यम् । द्वि॒ष्मः । इति॑ । आ॒ह॒ । द्वौ ।
वा॒व । पु॒रु॒षौ । यम् । च॒ । ए॒व । द्वेष्टि॑ । यः । च॒ । ए॒नम् । द्वेष्टि॑ ।
तयोः॑ । ए॒व । अ॒न॒न्त॒रा॒य॒मि॒त्य॒न॒न्तः॑ – आ॒य॒म् । ग्री॒वाः । कृ॒न्त॒ति॒ ।
प॒श॒वः । वै । सो॒म॒क्र॒य॒ण्या॒ इति॑ सो॒म – क्र॒य॒ण्यै॑ । प॒दम् ।
या॒व॒त्त॒मू॒त॒मि॒ति॑ या॒वत् – त्मू॒त॒म् । स॒मि॒ति॑ । व॒प॒ति॒ । प॒शून् । ए॒व ।
अ॒वे॒ति॑ । रु॒न्धे॑ । अ॒स्मे॒ इति॑ । रा॒यः । इति॑ । स॒मि॒ति॑ । व॒प॒ति॒ ।
आ॒त्मा॒न॒म् । ए॒व । अ॒ध्व॒र्युः॑ । 57 (50)

TS 6.1.8.5

प॒शु॒भ्यो॒ ना॒न्त॒रे॒ति॒ त्वे॒ रा॒य॒ इति॑ य॒ज॒मा॒ना॒य॒ प्र॒ य॒च्छ॒ति॒ य॒ज॒मा॒न॒ ए॒व
र॒यिं॑ द॒धा॒ति॒ तो॒ते॒ रा॒य॒ इति॑ प॒त्न्या॒ अ॒र्धो॑ वा ए॒ष आ॒त्म॒नो॒ यत्
प॒त्नी॒ यथा॑ गृ॒हेषु॑ नि॒धत्ते॑ ता॒दृ॒गे॒व॒ तत् त्व॒ष्टी॒मती॑ ते स॒पे॒ये॒त्या॒ह॒ त्व॒ष्टा
वै प॒शूनां॑ मि॒थु॒ना॒ना॒ रूप॒कृद्-रूप॒मे॒व॒ प॒शुषु॑ द॒धा॒त्य॒स्मै॒ वै
लो॒का॒य॒ गा॒र्ह॒प॒त्य॒ आ॒ धी॒य॒ते॒ () ऽमु॒ष्मा॒ आ॒ह॒व॒नी॒यो॒ यद्-

गार्॒ह॒प॒त्य॒ उप॒व॒पे॒द॒स्मिन् ँलो॒के प॒शु॒मा॒न्थ॒ स्याद्-यदा॑ह॒वनी॒ये
ऽमु॒ष्मिन् ँलो॒के प॒शु॒मा॒न्थ॒ स्यादु॒भयो॒रुप॒ वप॒त्यु॒भयो॒रे॒वैनं॑ ँलो॒कयोः॑
प॒शु॒म॒न्तं॑ करोति ॥ 58

TS 6.1.8.5 - Padam

प॒शु॒भ्य॒ इति॑ प॒शु - भ्यः॑ । न । अ॒न्तः । ए॒ति । त्वे॑ इति॑ । रा॒यः ।
इति॑ । यज॑मा॒नाय॑ । प्रेति॑ । य॒च्छ॒ति । यज॑मा॒ने । ए॒व । र॒यिम् ।
द॒धा॒ति । तो॒ते॑ । रा॒यः । इति॑ । प॒त्नियै॑ । अ॒र्धः । वै । ए॒षः ।
आ॒त्म॒नः॑ । यत् । प॒त्नी॑ । यथा॑ । गृ॒हेषु॑ । नि॒धत्त॑ इति॑ नि - ध॒त्ते ।
ता॒दृक् । ए॒व । तत् । त्व॒ष्टी॒मती॑ । ते । स॒पे॒य । इति॑ । आ॒ह । त्व॒ष्टा॑ ।
वै । प॒शूना॑म् । मि॒थु॒ना॒ना॑म् । रू॒प॒कृ॒दि॒ति॑ रू॒प - कृ॒त् । रू॒पम् ।
ए॒व । प॒शुषु॑ । द॒धा॒ति । अ॒स्मै । वै । लो॒काय॑ ।
गार्॒ह॒प॒त्य॒ इति॑ गार्॒ह - प॒त्यः॑ । ए॒ति । धी॒य॒ते () । अ॒मु॒ष्मै॑ ।
आ॒ह॒व॒नी॒य॒ इत्या॑ - ह॒व॒नी॒यः॑ । यत् । गार्॒ह॒प॒त्य॒ इति॑ गार्॒ह - प॒त्ये॑ ।
उ॒प॒व॒पे॒दि॒त्युप॑ - व॒पेत् । अ॒स्मिन् । लो॒के ।

प॒शु॒मा॒नि॒ति॒ प॒शु – मा॒न् । स्या॒त् । यत् । आ॒ह॒व॒नी॒य
 इ॒त्या – ह॒व॒नी॒यै॑ । अ॒मु॒ष्मि॒न् । लो॒के । प॒शु॒मा॒नि॒ति॒ प॒शु – मा॒न् ।
 स्या॒त् । उ॒भयोः॑ । उ॒पे॒ति॑ । व॒प॒ति॑ । उ॒भयोः॑ । ए॒व । ए॒न॒म् ।
 लो॒कयोः॑ । प॒शु॒म॒न्त॒मि॒ति॒ प॒शु – म॒न्त॒म् । क॒रो॒ति॑ ॥ 58 (74)

(म॒हि॒मा॒न॒ – स्वा॒हा – ऽप॒ह॒त्या – अ॒ध्व॒र्यु – धी॒य॒ते –
 च॒तुर्वि॒ंश॒तिश्च॑) (A8)

TS 6.1.9.1

ब्र॒ह्म॒वा॒दि॒नो॑ वदन्ति वि॒चि॒त्यः॒ सो॒मा(३) न वि॒चि॒त्या(३) इति॒ सो॒मो
 वा ओष॑धी॒ना॒ राजा॒ तस्मि॒न् । यदा॑प॒न्नं॑ ग्र॒सि॒तमे॒वा॒स्य॒ तद्-यद्-
 वि॒चि॒नु॒याद्-यथा॒ ऽऽस्या॑द्ग्र॒सि॒तं नि॒ष्वि॒द॒ति॑ ता॒दृगे॒व तद्य॑न्न
 वि॒चि॒नु॒याद्-यथा॒ ऽक्ष॑न्नाप॒न्नं वि॒धा॒व॒ति॑ ता॒दृगे॒व तत् क्षो॑धु॒को
 ऽध्व॑र्युः स्यात् क्षो॑धु॒को यज॑मानः सोम॑वि॒क्रयि॑न्थ् सोम॑
 शो॒ध॒ये॒त्ये॒व ब्रू॑याद् यदी॒तरं॑ – [] 59

TS 6.1.9.1 - Padam

ब्र॒ह्म॒वादि॑न इति॑ ब्र॒ह्म – वादि॑नः । वद॑न्ति । वि॒चि॒त्य इति॑
वि-चि॒त्यः । सोमा॑(३)ः । न । वि॒चि॒त्या(३) इति॑ वि – चि॒त्या(३)ः ।
इति॑ । सोमः॑ । वै । ओष॑धीनाम् । राजा॑ । तस्मिन् । यत् ।
आप॑न्नमित्या – प॒न्नम् । ग्र॒सि॒तम् । ए॒व । अ॒स्य । तत् । यत् ।
वि॒चि॒नुया॑दिति॑ वि – चि॒नुयात् । यथा॑ । आ॒स्यात् । ग्र॒सि॒तम् ।
नि॒ष्वि॒दतीति॑ निः – खि॒दति॑ । तादृ॑क् । ए॒व । तत् । यत् । न ।
वि॒चि॒नुया॑दिति॑ वि – चि॒नुयात् । यथा॑ । अ॒क्षन् ।
आप॑न्नमित्या – प॒न्नम् । वि॒धा॒वतीति॑ वि – धा॒वति॑ । तादृ॑क् । ए॒व ।
तत् । क्षो॑धुकः । अ॒ध्व॒र्युः । स्यात् । क्षो॑धुकः । यज॑मानः ।
सोम॑विक्रयि॒न्निति॑ सोम॑ – वि॒क्रयि॑न् । सोम॑म् । शो॒धय॑ । इति॑ । ए॒व ।
ब्रू॒यात् । यदि॑ । इ॒तरम् । 59 (50)

TS 6.1.9.2

यदी॑तरमु॒भये॑नै॒व सोम॑विक्रयि॒ण-म॑र्पयति॒ तस्मा॑त् सोम॑विक्रयी
क्षो॑धुको ऽरु॒णो ह॑ स्माऽऽ*हौ॒पवे॑शिः सोम॑क्रय॒ण ए॒वाहं॑ तृतीय

स॒व॒न॒म॒व॒ रु॒न्ध॒ इति॑ प॒शू॒नां॑ च॒र्मन्॑ मि॒मी॒ते प॒शू॒ने॒वा॒व॒ रु॒न्धे प॒श॒वो॑ हि
तृ॒ती॒य॒ꣳ स॒व॒नं॑ यं॒ का॒म॒ये॒ता॒प॒शुः॑ स्या॒दि॒त्यृ॒क्ष॒त॒स्त॒स्य॑ मि॒मी॒त॒र्क्षं॑ वा
अ॒प॒श॒व्य॒म॒प॒शु॒रे॒व॒ भ॒व॒ति॑ यं॒ का॒म॒ये॒त॒ प॒शु॒मा॒न्त् स्या॒ – [] 60

TS 6.1.9.2 - Padam

य॒दि । इ॒तर॒म् । उ॒भ॒ये॒न॒ । ए॒व । सो॒म॒वि॒क्र॒यि॒ण॒मि॒ति॑
सो॒म – वि॒क्र॒यि॒ण॒म् । अ॒र्प॒य॒ति॑ । त॒स्मा॒त् ।
सो॒म॒वि॒क्र॒यी॒ति॑ सो॒म – वि॒क्र॒यी॒ । क्षो॒धु॒कः॑ । अ॒रु॒णः॑ । ह॒ । स्म॒ ।
आ॒ह॒ । औ॒प॒वे॒शि॒रि॒त्यौ॒प॒-वे॒शिः॑ । सो॒म॒क्र॒य॒ण॒ इति॑ सो॒म – क्र॒य॒णे॒ ।
ए॒व । अ॒ह॒म् । तृ॒ती॒य॒स॒व॒न॒मि॒ति॑ तृ॒ती॒य – स॒व॒न॒म् । अ॒वे॒ति॑ । रु॒न्धे॒ ।
इति॑ । प॒शू॒ना॒म् । च॒र्म॒न् । मि॒मी॒ते॒ । प॒शू॒न् । ए॒व । अ॒वे॒ति॑ । रु॒न्धे॒ ।
प॒श॒वः॑ । हि॒ । तृ॒ती॒य॒म् । स॒व॒न॒म् । य॒म् । का॒म॒ये॒त॒ । अ॒प॒शुः॑ ।
स्या॒त् । इति॑ । ऋ॒क्ष॒तः॑ । त॒स्य॑ । मि॒मी॒त॒ । ऋ॒क्ष॒म् । वै॒ । अ॒प॒श॒व्य॒म् ।
अ॒प॒शुः॑ । ए॒व । भ॒व॒ति॑ । य॒म् । का॒म॒ये॒त॒ । प॒शु॒मा॒नि॒ति॑ प॒शु – मा॒न् ।
स्या॒त् । 60 (50)

TS 6.1.9.3

–दिति॑ लो॒म॒त॒स्त॒स्य॑ मि॒मी॒तै॒त॒द्वै॑ प॒शू॒नाꣳ रू॒पꣳ रू॒पे॒णै॒वा॒स्मै॑
प॒शू॒न॒व॑ रु॒न्धे॑ प॒शु॒मा॒ने॒व॑ भ॒व॒त्य॒पा॒म॒न्ते॑ क्री॒णा॒ति॑ सर॒स॒मे॒वैनं॑
क्री॒णा॒त्य॒–मा॒त्योऽसी॒त्या॒हा॒मै॒वैनं॑ कुरु॒ते शु॒क्र॒स्ते॒ ग्र॒ह॒ इ॒त्या॒ह शु॒क्रो
ह्य॒स्य॒ ग्र॒हो॒ ऽन॒साऽच्छ॑ या॒ति॑ म॒हि॒मा॒न॒–मे॒वा॒स्या॒च्छ॑ या॒त्य॒न॒सा – [] 61

TS 6.1.9.3 - Padam

इति॑ । लो॒म॒तः॑ । त॒स्य॑ । मि॒मी॒त॑ । ए॒तत् । वै । प॒शू॒नाम् । रू॒पम् ।
रू॒पे॒ण॑ । ए॒व । अ॒स्मै॑ । प॒शून् । अ॒वे॒ति॑ । रु॒न्धे॑ । प॒शु॒मा॒नि॒ति॑
प॒शु – मा॒न् । ए॒व । भ॒व॒ति॑ । अ॒पाम् । अ॒न्ते॑ । क्री॒णा॒ति॑ ।
सर॒स॒मि॒ति॑ स–र॒सम् । ए॒व । ए॒नम् । क्री॒णा॒ति॑ । अ॒मा॒त्यः॑ । अ॒सि॒ ।
इति॑ । आ॒ह॒ । अ॒मा॒ । ए॒व । ए॒नम् । कु॒रु॒ते॑ । शु॒क्रः॑ । ते॒ । ग्र॒हः॑ ।
इति॑ । आ॒ह॒ । शु॒क्रः॑ । हि॒ । अ॒स्य॑ । ग्र॒हः॑ । अ॒न॒सा॒ । अ॒च्छ॑ । या॒ति॑ ।
म॒हि॒मा॒नम्॑ । ए॒व । अ॒स्य॑ । अ॒च्छ॑ । या॒ति॑ । अ॒न॒सा॒ । 61 (50)

TS 6.1.9.4

ऽच्छ॑ या॒ति॑ तस्मा॒दनो॒वा॒ह्यꣳ स॒मे जी॒व॒नं॑ य॒त्र ख॒लु वा ए॒तꣳ
शी॒र्ष्णा॑ हर॒न्ति॑ तस्मा॒च्छी॒र्ष॒हा॒र्यं॑ गि॒रौ जी॒व॒न॒म॒भि॒ त्यं दे॒वꣳ

स॒वि॒ता॒र॒मि॒त्य॒ति॒-छ॒न्द॒स॒र्चा॒ मि॒मी॒ते॒ ऽति॒च्छ॒न्दा॒ वै॒ सर्वा॑णि॒ छ॒न्दा॒ऽसि॒
सर्वे॑भि॒रे॒वैनं॑ छ॒न्दो॑भि॒र्मि॒मी॒ते॒ वर्ष्म॑ वा ए॒षा छ॒न्द॒सां॑ य॒दति॑च्छ॒न्दा॒
य॒दति॑च्छ॒न्द॒स॒र्चा॒ मि॒मी॒ते॒ वर्ष्मै॑वैनं॑ स॒मा॒ना॒नां॑ क॒रो॒त्ये॒क॒यै॒क॒यो॒थ्
स॒र्गः॑- [] 62

TS 6.1.9.4 - Padam

अ॒च्छ॒ । या॒ति॒ । तस्मा॑त् । अ॒नो॒वा॒ह्य॒मि॒त्य॒नः॑ - वा॒ह्य॒म् । स॒मे॒ ।
जी॒व॒न॒म् । य॒त्र । ख॒लु॒ । वै॒ । ए॒त॒म् । शी॒र्ष्णा॑ । ह॒र॒न्ति॒ । तस्मा॑त् ।
शी॒र्ष॒हा॒र्य॒मि॒ति॒ शी॒र्ष॒-हा॒र्य॒म् । गि॒रौ॒ । जी॒व॒न॒म् । अ॒भी॒ति॒ । त्य॒म् ।
दे॒व॒म् । स॒वि॒ता॒र॒म् । इ॒ति॒ । अ॒ति॒च्छ॒न्द॒से॒त्य॒ति॒ - छ॒न्द॒सा॒ । ऋ॒चा॒ ।
मि॒मी॒ते॒ । अ॒ति॒च्छ॒न्दा॒ इ॒त्य॒ति॒ - छ॒न्दाः॑ । वै॒ । सर्वा॑णि॒ । छ॒न्दा॒ऽसि॒ ।
सर्वे॑भिः । ए॒व । ए॒न॒म् । छ॒न्दो॑भि॒रि॒ति॒ छ॒न्दः॑-भिः । मि॒मी॒ते॒ । वर्ष्म॑ ।
वै॒ । ए॒षा॒ । छ॒न्द॒साम्॑ । यत् । अ॒ति॒च्छ॒न्दा॒ इ॒त्य॒ति॒ - छ॒न्दाः॑ । यत् ।
अ॒ति॒च्छ॒न्द॒से॒त्य॒ति॒-छ॒न्द॒सा॒ । ऋ॒चा॒ । मि॒मी॒ते॒ । वर्ष्म॑ । ए॒व । ए॒न॒म् ।

स॒मा॒ना॒ना॒म् । क॒रो॒ति॒ । ए॒क॒यै॒क॒ये॒त्ये॒क॒या॒ – ए॒क॒या॒ ।

उ॒थ्स॒र्ग॒मि॒त्यु॒त् – स॒र्ग॒म् । 62 (50)

TS 6.1.9.5

मि॒मी॒ते॒ ऽया॒त॒या॒म॒न्या॒या॒त॒या॒म॒न्यै॒वैनं॑ मि॒मी॒ते॒ तस्मा॑न्ना॒ना॒वी॒र्या॑
अ॒ङ्गु॒ल॒यः॑ स॒र्वा॒स्व॒ङ्गु॒ष्ठ॒मु॒प॒ नि॒ गृ॒ह्णा॒ति॒ तस्मा॑त् स॒मा॒व॒द्दी॒र्यो॒ऽन्या॒भि॒-
र॒ङ्गु॒लि॒भि॒स्तस्मा॑त् स॒र्वा॒ अनु॑ सं च॒रति॑ यथ् स॒ह स॒र्वा॒भि॒र्मि॒मी॒त
स॒ञ्जि॒लि॒ष्टा अ॒ङ्गु॒ल॒यो जा॒येर॒-न्ने॒क॒यै॒क॒यो॒त् स॒र्गं मि॒मी॒ते॒ तस्मा॑द्
वि॒भक्ता॑ जा॒यन्ते॑ पञ्च॒ कृ॒त्वो य॒जु॒षा मि॒मी॒ते॒ पञ्चा॑क्ष॒रा प॒ङ्क्तिः॑ पा॒ङ्क्तौ
य॒ज्ञो य॒ज्ञमे॒वाव॑ रु॒न्धे पञ्च॑ कृ॒त्वस्तू॒ष्णीं॑ – [] 63

TS 6.1.9.5 - Padam

मि॒मी॒ते॒ । अ॒या॒त॒या॒म॒न्या॒या॒त॒या॒म॒न्ये॒त्यया॑त॒या॒म॒न्या॒-अ॒या॒त॒या॒म॒न्या॒ ।
ए॒व । ए॒नम् । मि॒मी॒ते॒ । तस्मा॑त् । ना॒ना॒वी॒र्या॑ इति॒ ना॒ना॒ – वी॒र्याः॑ ।
अ॒ङ्गु॒ल॒यः॑ । स॒र्वा॒सु॑ । अ॒ङ्गु॒ष्ठम् । उ॒प॒ । नी॒ति॒ । गृ॒ह्णा॒ति॒ । तस्मा॑त् ।
स॒मा॒व॒द्दी॒र्य इति॑ स॒मा॒वत् – वी॒र्यः॑ । अ॒न्या॒भिः॑ ।
अ॒ङ्गु॒लि॒भि॒रि॒त्यङ्गु॑लि॒ – भिः॑ । तस्मा॑त् । स॒र्वाः॑ । अनु॑ । स॒मि॒ति॒ ।

च॒रति॑ । यत् । स॒ह । सर्वा॑भिः । मिमी॑त । सञ्श्लि॑ष्टा इति॑
सं – श्लि॑ष्टाः । अ॒ङ्गुल॑यः । जा॒येरन् । एक॑यैक॒येत्येक॑या-एक॒या ।
उ॒त्स॒र्गमि॑त्युत् – सर्ग॑म् । मिमी॑ते । तस्मा॑त् । विभ॑क्ता इति॑
वि – भ॑क्ताः । जा॒यन्ते॑ । पञ्च॑ । कृ॒त्वः । यजु॑षा । मिमी॑ते ।
पञ्चा॑क्षरेति॑ पञ्च॑ – अ॒क्षरा॑ । प॒ङ्क्तिः॑ । पा॒ङ्क्तः॑ । य॒ज्ञः । य॒ज्ञम् ।
ए॒व । अ॒वेति॑ । रु॒न्धे । पञ्च॑ । कृ॒त्वः । तू॒ष्णीम् । 63 (50)

TS 6.1.9.6

-द॒श सं प॑द्यन्ते द॒शाक्ष॑रा वि॒राड॑न्नं वि॒राड् वि॒राजै॑वान्नाद्य॒मव॑ रु॒न्धे
यद् यजु॑षा मिमी॑ते भू॒तमे॒वाव रु॒न्धे यत् तू॒ष्णीं भ॑विष्यद्-यद्-
वै ता॒वाने॑व सोमः॒ स्याद् या॑वन्तं मिमी॑ते यज॑मानस्यै॒व स्या॑न्नापि॑
सद॑स्यानां प्र॒जाभ्य॑स्त्वेत्युप॒ समू॑हति सद॑स्याने॒वान्वा भ॑जति॒
वा॒ससो॑प न॒ह्यति॑ सर्व॒देव॑त्यं वै – [] 64

TS 6.1.9.6 - Padam

द॒श । स॒मिति॑ । प॒द्यन्ते॑ । द॒शाक्ष॑रेति॑ द॒श – अ॒क्षरा॑ । वि॒राडिति॑
वि – रा॒ट् । अ॒न्नम् । वि॒राडिति॑ वि – रा॒ट् । वि॒राजे॑ति वि – रा॒जा ।

ए॒व । अ॒न्नाद्य॒मित्य॑न्न – अद्य॑म् । अ॒वेति॑ । रु॒न्धे । यत् । य॒जुषा॑ ।
मिमी॑ते । भू॒तम् । ए॒व । अ॒वेति॑ । रु॒न्धे । यत् । तू॒ष्णीम् । भ॒विष्य॑त् ।
यत् । वै । ता॒वान् । ए॒व । सोमः॑ । स्यात् । याव॑न्तम् । मिमी॑ते ।
यज॑मानस्य । ए॒व । स्यात् । न । अ॒पीति॑ । स॒दस्या॑नाम् ।
प्र॒जाभ्य॑ इति॑ प्र – जा॒भ्यः । त्वा । इति॑ । उप॑ । स॒मिति॑ । ऊ॒हति॑ ।
स॒दस्या॑न् । ए॒व । अ॒न्वाभ॑जतीत्यनु – आ॒भज॑ति । वास॑सा । उपेति॑ ।
न॒ह्यति॑ । स॒र्वदे॒वत्य॑मिति॑ स॒र्व – दे॒वत्य॑म् । वै । 64 (50)

TS 6.1.9.7

वासः॑ स॒र्वाभि॑रेवैनं॑ दे॒वता॑भिः । स॒मर्द्ध॑यति॑ प॒शवो॑ वै सोमः॑ प्रा॒णाय॑
त्वेत्यु॑प न॒ह्यति॑ प्रा॒णमे॒व प॒शुषु॑ दधाति॑ व्या॒नाय॑ त्वेत्यनु॑ शृ॒न्थति॑
व्या॒नमे॒व प॒शुषु॑ दधाति॑ तस्मा॑त् स्व॒पन्तं॑ प्रा॒णा न॑ ज॒हति॑ ॥ 65

TS 6.1.9.7 - Padam

वासः॑ । स॒र्वाभिः॑ । ए॒व । ए॒नम् । दे॒वता॑भिः । स॒मिति॑ । अ॒र्द्धय॑ति ।
प॒शवः॑ । वै । सोमः॑ । प्रा॒णाय॑ति॑ प्र – अ॒नाय॑ । त्वा । इति॑ । उपेति॑ ।

न॒ह्यति॑ । प्रा॒णमि॑ति प्र – अ॒नम् । ए॒व । प॒शुषु॑ । द॒धाति॑ । व्या॒नाये॑ति
 वि – अ॒नाय॑ । त्वा । इति॑ । अ॒न्वि॑ति । शृ॒न्थति॑ । व्या॒नमि॑ति
 वि – अ॒नम् । ए॒व । प॒शुषु॑ । द॒धाति॑ । तस्मा॑त् । स्व॒पन्त॑म् ।
 प्रा॒णा इति॑ प्र – अ॒नाः । न । ज॒हति॑ ॥ 65 (33)

(इ॒तरं – प॒शुमा॑न्थ॒ स्याद् – या॒त्यन॑सो – थ्सर्ग॑ – तू॒ष्णीꣳ –
 स॒र्वदे॑वत्यं॒ वै – त्रय॑स्त्रिꣳश॒च्च) (A9)

TS 6.1.10.1

यत् क॒लया॑ ते श॒फेन॑ ते क्री॒णानी॑ति प॒णेता॑गोअ॒र्घꣳ सोमं॑
 कुर्या॑दगोअ॒र्घं य॑ज॒मान॒मगो॑अ॒र्घम॑ध्व॒र्युं गो॑स्तु म॒हिमा॑नं ना॒व ति॑रेद्
 गवा॑ ते क्री॒णानी॑त्ये॒व ब्रू॑याद् गोअ॒र्घमे॒व सोमं॑ क॒रोति॑ गोअ॒र्घं
 य॑ज॒मानं गो॑अ॒र्घम॑ध्व॒र्युं न गो॑र्म॒हिमा॑नम॒व ति॑रत्य॒जया॑ क्री॒णाति॑
 स॒तप॑समे॒वैनं॑ क्री॒णाति॑ हि॒रण्ये॑न क्री॒णाति॑ स॒शुक्र॑मे॒वै – [] 66

TS 6.1.10.1 - Padam

यत् । क॒लया॑ । ते । श॒फेन॑ । ते । क्री॒णानि॑ । इति॑ । प॒णेत॑ ।
 अ॒गोअ॒र्घमि॑त्यगो – अ॒र्घम् । सोम॑म् । कुर्या॑त् ।

अ॒गो॑अ॒र्घमि॒त्यगो॑ – अ॒र्घम् । यज॑मानम् । अ॒गो॑अ॒र्घमि॒त्यगो॑-अ॒र्घम् ।
 अ॒ध्व॒र्युम् । गोः । तु । म॒हि॒मा॒नम् । न । अ॒वेति॑ । ति॒रेत् । ग॒वा॑ ।
 ते । क्री॒णा॒नि । इति॑ । ए॒व । ब्रू॒यात् । गो॒अ॒र्घमि॒ति गो – अ॒र्घम् ।
 ए॒व । सोम॑म् । क॒रोति॑ । गो॒अ॒र्घमि॒ति गो – अ॒र्घम् । यज॑मानम् ।
 गो॒अ॒र्घमि॒ति गो – अ॒र्घम् । अ॒ध्व॒र्युम् । न । गोः । म॒हि॒मा॒नम् ।
 अ॒वेति॑ । ति॒रति॑ । अ॒जया॑ । क्री॒णा॒ति । स॒त॒प॒स॒मि॒ति स – त॒प॒स॒म् ।
 ए॒व । ए॒नम् । क्री॒णा॒ति । हि॒र॒ण्ये॒न । क्री॒णा॒ति ।
 स॒शु॒क्र॒मि॒ति स – शु॒क्रम् । ए॒व । 66 (50)

TS 6.1.10.2

–नं॑ क्री॒णा॒ति धे॒न्वा क्री॒णा॒ति सा॒शि॒र॒मे॒वैनं॑ क्री॒णा॒त्यृष॒भेण॑ क्री॒णा॒ति
 से॒न्द्र॒मे॒वैनं॑ क्री॒णा॒त्यन॒डुहा॑ क्री॒णा॒ति वह्नि॒र्वा अन॒ड्वान् वह्नि॒नैव वह्नि॑
 य॒ज्ञस्य॑ क्री॒णा॒ति मि॒थु॒नाभ्यां॑ क्री॒णा॒ति मि॒थु॒नस्याव॑-रु॒द्ध्यै वा॒स॒सा
 क्री॒णा॒ति स॒र्वदे॒वत्यं॑ वै वा॒सः स॒र्वाभ्य॑ ए॒वैनं॑ दे॒वता॑भ्यः
 क्री॒णा॒ति द॒श सं प॒द्यन्ते॑ द॒शाक्ष॑रा वि॒राड॒न्नं वि॒राड्
 वि॒राजै॑वान्नाद्य॒मव॑ रु॒न्धे – [] 67

TS 6.1.10.2 - Padam

ए॒नम् । क्री॒णा॒ति । धे॒न्वा । क्री॒णा॒ति । सा॒शि॒र॒मि॒ति स – आ॒शि॒र॒म् ।
ए॒व । ए॒नम् । क्री॒णा॒ति । ऋ॒ष॒भे॒ण । क्री॒णा॒ति । से॒न्द्र॒मि॒ति स-इ॒न्द्र॒म् ।
ए॒व । ए॒नम् । क्री॒णा॒ति । अ॒न॒डु॒हा ॥ क्री॒णा॒ति । वह्निः॑ । वै ।
अ॒न॒ड्वान् । वह्नि॑ना । ए॒व । वह्नि॑ । य॒ज्ञ॒स्य॑ । क्री॒णा॒ति ।
मि॒थु॒नाभ्या॑म् । क्री॒णा॒ति । मि॒थु॒न॒स्य॑ । अ॒व॒रु॒द्ध्य॑ इत्य॒व – रु॒द्ध्यै॑ ।
वा॒स॒सा । क्री॒णा॒ति । स॒र्व॒दे॒व॒त्य॒मि॒ति स॒र्व – दे॒व॒त्य॒म् । वै । वा॒सः॑ ।
स॒र्वा॒भ्यः॑ । ए॒व । ए॒नम् । दे॒व॒ता॒भ्यः॑ । क्री॒णा॒ति । द॒श । स॒मि॒ति ।
प॒द्य॒न्ते । द॒शाक्ष॑रेति द॒श – अ॒क्ष॒रा । वि॒रा॒डि॒ति वि – राट् । अ॒न्न॒म् ।
वि॒रा॒डि॒ति वि – राट् । वि॒रा॒जे॒ति वि – रा॒जा ॥ ए॒व ।
अ॒न्ना॒द्य॒मि॒त्य॒न्न – अ॒द्य॒म् । अ॒वे॒ति । रु॒न्धे ॥ 67 (50)

TS 6.1.10.3

त॒प॒स॒स्त॒नूर॑सि प्र॒जा॒प॒ते॒र्व॒र्ण इ॒त्या॒ह प॒शु॒भ्य॑ ए॒व तद॑ध्व॒र्यु॒र्नि हु॑त
आ॒त्म॒नोऽना॑व॒स्का॒य ग॒च्छ॒ति श्रि॒यं प्र प॒शूना॑प्नोति य ए॒वं वैद॑ शु॒क्रं
ते शु॒क्रे॑ण क्री॒णा॒मी॒त्या॒ह यथा॑ य॒जु॒रे॒वैत॑द् दे॒वा वै ये॒न हि॑रण्ये॒न

सोमम॑क्री॒णन् तद॑भी॒षहा पुन॑राऽद॒दत् को हि तेज॑सा वि॒क्रेष्य॑त
इति॑ येन॑ हिर॒ण्येन॑ – [] 68

TS 6.1.10.3 - Padam

तप॑सः । त॒नूः । अ॒सि । प्र॒जाप॑तेरि॒ति प्र॒जा – प॒तेः । वर्णः॑ । इति॑ ।
आ॒ह । प॒शुभ्य॑ इति॑ प॒शु – भ्यः॑ । ए॒व । तत् । अ॒ध्व॒र्युः । नीति॑ ।
हु॒ते । आ॒त्मनः॑ । अ॒ना॒व्र॒स्का॒येत्य॑ना – व्र॒स्का॒य । गच्छ॑ति । श्रि॒यम् ।
प्रेति॑ । प॒शून् । आ॒प्नो॒ति । यः । ए॒वम् । वेद॑ । शु॒क्रम् । ते ।
शु॒क्रेण॑ । क्री॒णामि॑ । इति॑ । आ॒ह । य॒थाय॑जु॒रिति॑ य॒था-य॑जुः । ए॒व ।
ए॒तत् । दे॒वाः । वै । येन॑ । हिर॒ण्येन॑ । सोम॑म् । अ॒क्री॑णन् । तत् ।
अ॒भीष॑हेत्य॒भि-स॑हा । पुनः॑ । ए॒ति । अ॒द॒दत् । कः । हि । तेज॑सा ।
वि॒क्रेष्य॑त इति॑ वि – क्रेष्य॑ते । इति॑ । येन॑ । हिर॒ण्येन॑ । 68 (50)

TS 6.1.10.4

सोमं॑ क्री॒णीया॑त् तद॑भी॒षहा पुन॑रा द॒दीत॑ तेज॑ ए॒वाऽऽत्म॑न् ध॒त्तेऽस्मे
ज्योतिः॑ सोम॑वि॒क्रयि॑णि तम॑ इत्या॒ह ज्योति॑रे॒व यज॑माने दधाति॑ तम॑सा
सोम॑वि॒क्रयि॑णम॒र्पय॑ति यदनु॑प॒ग्रथ्य॑ ह॒न्याद्-द॒न्दशू॑का॒स्तां समा॑ं

सर्पाः स्युरिदमहं सर्पाणां दन्दशूकानां ग्रीवा उप ग्रथनामीत्याहा-
दन्दशूकास्तां समां सर्पा भवन्ति तमसा सोमविक्रयिणं

विद्ध्यति स्वान – [] 69

TS 6.1.10.4 - Padam

सोमम् । क्रीणीयात् । तत् । अभीषहेत्यभि – सहा । पुनः । एति ।
ददीत । तेजः । एव । आत्मन् । धत्ते । अस्मे इति । ज्योतिः ।
सोमविक्रयिणीति सोम-विक्रयिणि । तमः । इति । आह । ज्योतिः ।
एव । यजमाने । दधाति । तमसा । सोमविक्रयिणमिति
सोम – विक्रयिणम् । अर्पयति । यत् । अनुपग्रथ्येत्यनुप – ग्रथ्य ।
हन्यात् । दन्दशूकाः । ताम् । समाम् । सर्पाः । स्युः । इदम् ।
अहम् । सर्पाणाम् । दन्दशूकानाम् । ग्रीवाः । उपेति । ग्रथ्नामि ।
इति । आह । अदन्दशूकाः । ताम् । समाम् । सर्पाः । भवन्ति ।
तमसा । सोमविक्रयिणमिति सोम – विक्रयिणम् । विद्ध्यति ।
स्वान । 69 (50)

TS 6.1.10.5

भ्रा॒जे॒त्या॒है॒ते वा अ॒मु॒ष्मिन् लो॒के सोम॑म॒रक्षन् ते॒भ्योऽधि॒ सोम॑मा॒हरन् ।
यदे॒तेभ्यः॑ सोम॒क्रय॑णा-न्ना॒नुदि॒शेद॒क्रीतो॑ऽस्य सोमः॑ स्यान्ना॒स्यैते॑
ऽमु॒ष्मिन् लो॒के सोम॑ रक्षे॒युर्यदे॒तेभ्यः॑ सोम॒क्रय॑णाननुदि॒शति॑
क्री॒तोऽस्य॑ सोमो॑ भवत्ये॒तेऽस्या॒मुष्मिन् लो॒के सोम॑ रक्षन्ति ॥ 70

TS 6.1.10.5 - Padam

भ्रा॒ज । इति॑ । आ॒ह । ए॒ते । वै । अ॒मु॒ष्मिन् । लो॒के । सोम॑म् ।
अ॒रक्षन् । ते॒भ्यः । अधी॑ति । सोम॑म् । एति॑ । अ॒हरन् । यत् ।
ए॒तेभ्यः॑ । सोम॒क्रय॑णानिति॑ सोम - क्रय॑णान् । न ।
अ॒नुदि॒शेदित्यनु॑ - दि॒शेत् । अ॒क्रीतः॑ । अ॒स्य । सोमः॑ । स्यात् । न ।
अ॒स्य । ए॒ते । अ॒मु॒ष्मिन् । लो॒के । सोम॑म् । रक्षे॒युः । यत् । ए॒तेभ्यः॑ ।
सोम॒क्रय॑णानिति॑ सोम - क्रय॑णान् । अ॒नुदि॒शतीत्यनु॑ - दि॒शति॑ ।
क्री॒तः । अ॒स्य । सोमः॑ । भवति॑ । ए॒ते । अ॒स्य । अ॒मु॒ष्मिन् ।
लो॒के । सोम॑म् । रक्षन्ति ॥ 70 (44) (स॒शु॒क्रमे॒व - रु॒न्ध - इति॑
येन॑ हि॒रण्ये॒न - स्वा॒न - चतु॑श्च॒त्वारि॑श॒च्च) (A10)

TS 6.1.11.1

वारु॒णो वै क्री॒तः सोम॑ उप॒नद्धो॑ मि॒त्रो न॒ एहि॑ सुमि॒त्रधा॑ इत्या॒ह
शान्त्या॑ इन्द्र॑स्यो॒रुमा॑ वि॒श दक्षि॑णमि॒त्याह॑ दे॒वा वै यꣳ सोम॑म॒क्रीणन्॑
तमिन्द्र॑स्यो॒रौ दक्षि॑ण आ ऽसा॑दयन्नेष खलु॒ वा एतर्॑.हीन्द्रो॒ यो यज॑ते
तस्मा॑दे॒वमा॒होदा॑युषा स्वा॒युषे॑त्याह दे॒वता॑ ए॒वा-न्वा॒रभ्यो॑त् - [] 71

TS 6.1.11.1 - Padam

वारु॒णः । वै । क्री॒तः । सोमः॑ । उप॒नद्ध॑ इत्युप॒-नद्धः॑ । मि॒त्रः । नः ।
एति॑ । इ॒हि । सुमि॒त्रधा॑ इति॑ सुमि॒त्र - धाः॑ । इति॑ । आ॒ह । शान्त्यै॑ ।
इन्द्र॑स्य । ऊ॒रुम् । एति॑ । वि॒श । दक्षि॑णम् । इति॑ । आ॒ह । दे॒वाः ।
वै । यम् । सोमम्॑ । अ॒क्रीणन्॑ । तम् । इन्द्र॑स्य । ऊ॒रौ । दक्षि॑णे ।
एति॑ । अ॒सा॒दयन्॑ । ए॒षः । खलु॑ । वै । एतर्॑.हि । इन्द्रः॑ । यः ।
यज॑ते । तस्मा॑त् । ए॒वम् । आ॒ह । उदि॑ति । आ॒युषा॑ ।
स्वा॒युषे॑ति सु - आ॒युषा॑ । इति॑ । आ॒ह । दे॒वताः॑ । ए॒व ।
अ॒न्वा॒रभ्ये॑त्यनु - आ॒रभ्य॑ । उदि॑ति । 71 (50)

TS 6.1.11.2

तिष्ठत्यु-र्वन्तरिक्ष-मन्विहीत्याहा-न्तरिक्षदेवत्यो(१) ह्येतरहि
सोमोऽदित्याः सदोऽस्यदित्याः सद आ सीदेत्याह यथायजुरेवैतद्
द्वि वा एनमेतददर्धयति यद् वारुणं सन्तं मैत्रं करोति
वारुण्यर्चाऽऽ सादयति स्वयैवैनं देवतया समदर्धयति वाससा
पर्यानह्यति सर्वदेवत्यं वै वासः सर्वाभिरेवै - [] 72

TS 6.1.11.2 - Padam

तिष्ठति । उरु । अन्तरिक्षम् । अन्विति । इहि । इति । आह ।
अन्तरिक्षदेवत्य इत्यन्तरिक्ष - देवत्यः । हि । एतरहि । सोमः ।
अदित्याः । सदः । असि । अदित्याः । सदः । एति । सीद । इति ।
आह । यथायजुरिति यथा-यजुः । एव । एतत् । वीति । वै । एनम् ।
एतत् । अदर्धयति । यत् । वारुणम् । सन्तम् । मैत्रम् । करोति ।
वारुण्या । ऋचा । एति । सादयति । स्वया । एव । एनम् । देवतया ।
समिति । अदर्धयति । वाससा । पर्यानह्यतीति परि - आनह्यति ।
सर्वदेवत्यमिति सर्व - देवत्यम् । वै । वासः । सर्वाभिः ।

एव । 72 (50)

TS 6.1.11.3

–नं दे॒वता॑भिः॒ सम॑र्द्धयत्यथो रक्ष॑सामप॒हत्यै॑ वने॒षु व्य॑न्तरि॒क्षं
तता॑नेत्याह॒ वने॑षु हि व्य॑न्तरि॒क्षं तता॑न वाज॒मर्व॑त्स्वित्याह॒ वाज॑
ह्यर्व॑त्सु॒ पयो॑ अ॒घ्निया॑स्वित्याह॒ पयो॑ ह्य॒घ्निया॑सु॒ ह॒त्सु क्र॑तुमि॒त्याह॑
ह॒त्सु हि क्र॑तुं वरु॑णो वि॒क्ष्वग्नि॑मि॒त्याह॑ वरु॑णो हि वि॒क्ष्वग्निं॑

दिवि॒ सूर्य॑ – [] 73

TS 6.1.11.3 - Padam

ए॒नम् । दे॒वता॑भिः । स॒मि॒ति । अ॒र्द्ध॒य॒ति । अथो॑ इति । रक्ष॑साम् ।
अप॑हत्या इत्यप॒ह॒त्यै । वने॑षु । वी॒ति । अ॒न्तरि॑क्षम् । तता॑न । इति ।
आ॒ह । वने॑षु । हि । वी॒ति । अ॒न्तरि॑क्षम् । तता॑न । वाज॑म् ।
अर्व॑त्स्वि॒त्यर्व॑त् – सु । इति । आ॒ह । वाज॑म् । हि ।
अर्व॑त्स्वि॒त्यर्व॑त् – सु । पयः॑ । अ॒घ्निया॑सु । इति । आ॒ह । पयः॑ ।
हि । अ॒घ्निया॑सु । ह॒त्स्वि॒ति ह॒त् – सु । क्र॑तुम् । इति । आ॒ह ।
ह॒त्स्वि॒ति ह॒त् – सु । हि । क्र॑तुम् । वरु॑णः । वि॒क्षु । अ॒ग्निम् । इति ।
आ॒ह । वरु॑णः । हि । वि॒क्षु । अ॒ग्निम् । दि॒वि । सूर्य॑म् । 73 (50)

TS 6.1.11.4

मि॒त्याह॑ दि॒वि हि॒ सूर्य॑ꣳ सोम॑म॒द्रावि॑त्याह॒ ग्रावा॑णो वा अ॒द्रय॑स्तेषु
वा ए॒ष सोमं॑ दधाति॒ यो यज॑ते तस्मा॑दे॒वमा॒होदु॑ त्यं जा॒तवे॑दसमि॒ति
सौर्य॑र्चा कृ॒ष्णाजि॑नं प्र॒त्यान॑ह्यति॒ रक्ष॑साम॒पह॑त्या उ॒स्रावे॑तं
धूर्॒षाहा॑वि॒त्याह॑ यथा॒यजु॑रे॒वैतत् प्र॑ च्यव॒स्व भुव॑स्पत॒ इत्या॑ह

भू॒ताना॑ꣳ ह्ये – [] 74

TS 6.1.11.4 - Padam

इति॑ । आ॒ह । दि॒वि । हि । सूर्य॑म् । सोम॑म् । अ॒द्रौ । इति॑ । आ॒ह ।
ग्रावा॑णः । वै । अ॒द्रयः॑ । तेषु॑ । वै । ए॒षः । सोम॑म् । द॒धाति॑ । यः ।
यज॑ते । तस्मा॑त् । ए॒वम् । आ॒ह । उ॒दिति॑ । उ । त्यम् ।
जा॒तवे॑दसमि॒ति जा॒त – वे॒दसम् । इति॑ । सौर्या॑ । ऋ॒चा ।
कृ॒ष्णाजि॑नमि॒ति कृ॒ष्ण – अ॒जिन॑म् । प्र॒त्यान॑ह्यतीति॒ प्रति॑-आ॒नह्य॑ति ।
रक्ष॑साम् । अ॒पह॑त्या इत्य॒प – ह॒त्यै । उ॒स्रौ । एति॑ । इ॒तम् ।
धूर्॒षाहा॑वि॒ति धूः – सा॒हौ । इति॑ । आ॒ह । यथा॒यजु॑रिति॒
यथा॑ – य॒जुः । ए॒व । ए॒तत् । प्रेति॑ । च्य॒वस्व॑ । भुवः॑ । प॒ते । इति॑ ।
आ॒ह । भू॒ताना॑म् । हि । 74 (50)

TS 6.1.11.5

– ष॑ पति॑र्वि॒श्वान्य॑भि॒ धामा॑नीत्या॒ह॒ वि॒श्वानि॑ ह्ये॒(१) षो॑ऽभि॒ धामा॑नि
प्र॒च्यव॑ते॒ मा त्वा॑ परि॒परी॑ वि॒ददित्या॑ह॒ यदे॒वादः॑ सोम॑मा॒ह्रिय॑माणं
गन्ध॑र्वो वि॒श्वान्य॑भि॒ धामा॑नीत्या॒ह॒ यज॑मानस्य
स्व॒स्त्यय॑न्यसीत्या॒ह॒ यज॑मानस्यै॒वैष॑ य॒ज्ञस्या॑न्वारं॒भो ऽन॑वच्छि॒त्यै
वरु॑णो वा ए॒ष यज॑मानम॒भ्यैति॑ यत् – [] 75

TS 6.1.11.5 - Padam

ए॒षः । पतिः॑ । वि॒श्वानि॑ । अ॒भीति॑ । धामा॑नि । इति॑ । आ॒ह॒ ।
वि॒श्वानि॑ । हि । ए॒षः । अ॒भीति॑ । धामा॑नि । प्र॒च्यव॑त इति॑
प्र – च्य॑वते । मा । त्वा॑ । परि॒परी॑ति परि – प॒री । वि॒दत् । इति॑ ।
आ॒ह॒ । यत् । ए॒व । अ॒दः । सोम॑म् ।
आ॒ह्रिय॑माणमि॒त्या – ह्रि॒यमा॑णम् । गन्ध॑र्वः ।
वि॒श्वान्य॑भि॒ धामा॑नीत्या॒ह॒ यज॑मानस्य
तस्मा॑त् । ए॒वम् । आ॒ह॒ । अ॒परि॑मोषायेत्य॒परि – मो॒षाय॑ ।
यज॑मानस्य । स्व॒स्त्यय॑नीति॑ स्व॒स्ति – अ॒यनी॑ । अ॒सि॒ । इति॑ ।

आ॒ह । य॒ज॒मा॒नस्य॑ । ए॒व । ए॒षः । य॒ज्ञस्य॑ । अ॒न्वा॒र॒म्भ
इ॒त्यनु॑ – आ॒र॒म्भः । अ॒न॒व॒च्छि॒त्या इ॒त्यन॑व – छि॒त्यै । व॒रु॒णः ।
वै । ए॒षः । य॒ज॒मा॒नम् । अ॒भि । ए॒ति । ए॒ति । यत् । 75 (50)

TS 6.1.11.6

क्री॒तः सोम॑ उ॒प॒न॒द्धो नमो॑ मि॒त्रस्य॑ व॒रु॒णस्य॑ च॒क्ष॒स इ॒त्याह॑
शा॒न्त्या आ॑ सोमं॑ व॒ह॒न्त्य॒ग्निना॑ प्र॒ति ति॒ष्ठते॑ तौ सं॒भ॒व॒न्तौ
य॒ज॒मा॒नम॑भि सं भ॒वतः॑ पु॒रा ख॒लु वा॒वैष॑ मे॒धायाऽऽ*त्मा॑न॒मा॒र॒भ्य
च॒रति॑ यो दी॒क्षि॒तो यद॑ग्नी॒षोमी॑यं प॒शुमा॑ल॒भत॑ आ॒त्म॒निष्क्र॑यण
ए॒वास्य॑ स तस्मा॒त् तस्य॑ नाऽऽ*श्यं॑ पु॒रुष॑निष्क्र॒यण इ॒व ह्यथो॑
ख॒ल्वाहु॑ () र॒ग्नी॒षोमा॑भ्यां॑ वा इन्द्रो॑ वृ॒त्रम॑ह॒न्निति॑ यद॑ग्नी॒षोमी॑यं
प॒शुमा॑ल॒भते॑ वा॒र्त्रघ्न॑ ए॒वास्य॑ स तस्मा॒द्-वा॒श्यं वा॒रु॒ण्यर्चा॑ परि
च॒रति॑ स्व॒यैवैनं॑ दे॒वत॑या परि च॒रति॑ ॥ 76

TS 6.1.11.6 - Padam

क्री॒तः । सोमः॑ । उ॒प॒न॒द्ध इ॒त्युप॑ – न॒द्धः । नमः॑ । मि॒त्रस्य॑ ।
व॒रु॒णस्य॑ । च॒क्ष॒से । इति॑ । आ॒ह । शा॒न्त्यै॑ । ए॒ति । सोम॑म् ।

वह॑न्ति । अ॒ग्निना॑ । प्र॒तीति॑ । ति॒ष्ठते॑ । तौ । सं॒भव॑न्ता॒विति॑
 सं – भव॑न्तौ । यज॑मानम् । अ॒भि । समि॑ति । भव॑तः । पु॒रा । खलु॑ ।
 वाव । ए॒षः । मे॒धाय॑ । आ॒त्मान॑म् । आ॒रभ्ये॑त्या॒रभ्य॑ । च॒रति॑ । यः ।
 दी॒क्षितः॑ । यत् । अ॒ग्नीषो॑मीयमि॒त्यग्नी॑ – सो॒मीय॑म् । प॒शुम् ।
 आ॒लभ॑त इ॒त्या – ल॑भते । आ॒त्मनि॑ष्क्रय॒ण इ॒त्यात्म॑ – नि॒ष्क्रय॑णः ।
 ए॒व । अ॒स्य । सः । तस्मा॑त् । तस्य॑ । न । आ॒श्रय॑म् । पु॒रुष॑नि॒ष्क्रय॑ण
 इति॑ पु॒रुष॑ – नि॒ष्क्रय॑णः । इ॒व । हि । अथो॑ इति॑ । खलु॑ ।
 आ॒हुः () । अ॒ग्नीषो॑मा॒भ्यामि॒त्यग्नी॑ – सो॒माभ्या॑म् । वै । इन्द्रः॑ ।
 वृ॒त्रम् । अ॒हन् । इति॑ । यत् । अ॒ग्नीषो॑मीयमि॒त्यग्नी॑ – सो॒मीय॑म् ।
 प॒शुम् । आ॒लभ॑त इ॒त्या – ल॑भते । वा॒र्त्रघ्न॑ इति॑ वा॒र्त्र – घ्नः॑ । ए॒व ।
 अ॒स्य । सः । तस्मा॑त् । उ । आ॒श्रय॑म् । वा॒रु॒ण्या । ऋ॒चा । प॒रीति॑ ।
 च॒रति॑ । स्व॒या । ए॒व । ए॒नम् । दे॒वत॑या । प॒रीति॑ । च॒रति॑ ॥ 76 (77)
 (अ॒न्वार॑भ्यो॒थ – सर्वा॑भिरे॒व – सूर्य॑ – भू॒ताना॑ ऽ ह्ये – ति॑ य –
 दा॒हुः – स॒प्तवि॑ंशतिश्च) (A11)

पद पाठे (वाक्य सहित) – षष्ठकाण्डे प्रथमः प्रश्नः

Prasna Korvai with starting Padams of 1 to 11 Anuvaakams :-

(प्राचीनव॒शं॑ – या॒वन्त॑ – ऋ॒क्सामे॑ – वा॒ग्वै दे॒वेभ्यो॑ –
दे॒वा वै दे॒वय॑जनं – क॒द्रूश्च॑ – तद्धि॑रण्य॒ञ् – षट् प॒दानि॑ –
ब्र॒ह्मवा॑दिनो वि॒चित्यो॑ – यत् क॒लया॑ ते – वा॒रुणो॑ वै क्री॒तः सोम॑ –
एका॑दश)

Korvai with starting Padams of 1, 11, 21 Series of Panchaatis :-

(प्राचीनव॒शं॑ – स्वा॒हेत्या॒ह – ये॒ऽन्तः श॒रा – ह्ये॒ष सं – तप॑सा
च – यत्कर्ण॑गृही – तेति॑ लो॒मतो॑ – वा॒रुणः॑ – षट् स॑प्ततिः)

First and Last Padam of First Prasnam of 6th Kandam

(प्राचीनव॒शं॑ – परि॑ चरति)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे षष्ठकाण्डे प्रथमः

प्रश्नः समाप्तः ॥

पद पाठे (वाक्य सहित) – षष्ठकाण्डे प्रथमः प्रश्नः

Details of Panchati and Padam for Kandam 6, Prasanam 1 (TS 6.1)

	Panchati	Padams
Anuvakam 1	9	448
Anuvakam 2	7	365
Anuvakam 3	8	398
Anuvakam 4	9	433
Anuvakam 5	5	258
Anuvakam 6	7	360
Anuvakam 7	8	400
Anuvakam 8	5	274
Anuvakam 9	7	333
Anuvakam 10	5	244
Anuvakam 11	6	327
Total →	76	3840

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
२. Please download our vedic compilations from our web site www.vedavms.in